

1:1 Kama dodi hirakahi o dunia idadi uahi, o Demo nagaka. O Demo naga de ma Jou Madutu dé o Demo kaimatero de ma Jou Madutu. **2** Kamahirahi Unanga de ma Jou Madutu. **3** Hagala mata-mata idadi kiani dede Unanga, dé hagala nēnanga naga, de kamoio de koiwa idadi nako dede Unangua. **4** O Demo gēnanga o ngango matiti, dé o ngango i hi döaka o dararono o nyawaika. **5** O dararono gēnanga itararono o huhutu magoronaka, dé o huhutu yakunua yahohonenge. **6** Woböa o nyawa wihulo-huloko ma Jou Madutu, o Yohanis airomanga. **7** Unanga woböa wohiabari mangale o dararono gēnanga, hupaya o nyawa mata-mata yongaku. **8** Unanga mahirete gēnanga o dararonua, ünanga duga-duga wohiabari. **9** O dararono madutu yātararono mata-mata o nyawa, iböa o duniaku. **10** O Demo naga o duniaka, o dunia idadi kiani dede Unanga, mä o dunia iwinākoua Unanga. **11** Unanga woböa aibereraika mahirete mä airoriadodoto iwitarimaua Unanga. **12** Mä nagaö o nyawa iwitarima Unanga de iwingaku Unangika, yahidöaka o haku yodadi ma Jou Madutu aingoha-ngohaka, **13** iwihingohaka o nyawa okaua de yaino, hababu o ngango mahungi gēnanga, ma ahali ma Jou Madutuoka de yaino. **14** O Demo ima dadioka o nyawa, de ēnanga igogere nanga hidogoronaka, dé ngone hamākeoka mamulia. Mamulia gēnanga watarima hokä o Ama aingohaka woma Tēngo-tēngoka. Unangoka ngone himāke ma Jou Madutu dé Ai dora ngoneino. **15** O Yohanis woböa hokä Ai hakihi, ünanga wohiabari: "Nenangala Unanga tohidododemoka: Unanga aha woböa wohihiduruino, mä iholoi wolamoko dede ngohi, hababu ngohi koihiwahi Unanga nagaka." **16** Unanga iwiomanga de o dora; koiwa madodogumu, Unanga wonahi barakati ngone. **17** Ma Jou aipareta ngone hatarima, o Musaka de yaino. Mä Ai dora de Ai setia ma Jou Madutu wohimatoko o Yesus Kristusoka de yaino. **18** Komaiwahi naga iwimāke ma Jou Madutu, mahomoa de ma Ama aingohaka woma Tēngo-tēngoka, kaimatero de ma Ama dé duru wotigi Unangika. Unangala wonahi matoko o Ama ngoneino. **19** Yokokuaha o Yahudioka o Yerusalemoka yāhuloko o imam-imam dé o Lewi manyawa yoiki o Yohanisika dé iwileha Unangika, "Ngonā nēnanga o nagona?" **20** O Yohanis womangaku

wohitotiaika, "Ngohiua o Koano Wohihohalamati." **21** "Nako hoko gënanga, ngona o nagona?" yoleha önanga. "Bote ngona o Elia?" "Kowali," o Yohanis wohaluhu. "Bote ngona o Nabi woamo-amoko?" yoleha önanga ihigalioli. "Kowali," wohaluhu. **22** Onanga yato, "Nako hokogënanga, nomihingahu ngomino o nagona ngona nënanga," "hupaya ngomi miakunu mihidöaka o bobaluhu o nyawa imihulo-huloko ngomi. Okia anidemo mangale anidiri mahirete?" **23** O Yohanis wohaluhu, "Ngohi neünanga ma Nabi Yesaya wotemoka: 'O nyawa yopöa-pöaka o tonaka makokakahaka: Nihitiai o ngëkomo mangale ma Jou.'" **24** O Farisioka yähulo-huloko o nyawa gënanga, **25** yolehali, "Nako ngona o Koano Wohihohalamatiua, o Eliaua, o Nabi woamo-amokua, yadodoa ngona näohiki?" **26** O Yohanis wohaluhu, "Ngohi to ohiki de o akere. Mä niahidogoronaka naga o nyawa ngini niwinäkoua. **27** Unanga woböa wohihiduruino, mä ngohi topatutua tahohe to Unanga aihapato maliliko." **28** Mata-mata gënanga idadi o Betania, o wange mahiwara o Yordan ma Ngairi, o ngi o Yohanis wo ohiki. **29** Yarehino mawange, o Yohanis wimäke o Yesus waika unangika. Daha o Yohanis wätemo, "Niwilega, ge Unanga ma Jou Madutu ai Duba ma Ngohaka yäoehe-ehe o dunia mabaradoha. **30** Unanga ngohi tohidodemoka aha woböa wohihiduruino, mä Unanga iholoi wolamoko dede ngohi, hababu ngohi tomakilauahi, Unanga nagaka. **31** Kowahi de gënanga, ngohi tinäkoua o nagona Unanga gënanga. Enahioko ngohi toböa to ohiki de o akere, hupaya o Israeloka manyawa iwinäko Unanga." **32** O Yohanisö wohidöaka o hakihi nënanga, "Ngohi tamäke ma Jou Madutu ai Womaha iuti hokä o namodara o dihanguku dé itangi ailokuku. **33** Oraha gënanga ngohi tinäkouahi o nagona Unanga. Mä ma Jou Madutu wohihuloko to ohiki de o akere wotemoka ngohino, 'Nako ngona namäke ma Jou Madutu ai Womaha iuti, dé itangi Ai lokuoka womatëngo, Unanga aha wo ohiki de ma Jou Madutu ai Womaha.' **34** Ngohi mahirete tamäkeoka," o Yohanis wato, "dé ngohi tohidöaka hakihi Unanga ma Jou Madutu ai Ngohaka." **35** Yarehino mawange, o Yohanis naga o ngi genangokali de iwinöniniki yahinoto. **36** Maöraha Unanga wimäke o Yesus wakaino, ünanga wato, "Niwi lega! Gënanga ma Jou Madutu ai Duba ma Ngohaka." **37** Yahinoto iwinöniniki

o Yohanis yoihene o demo gënanga, yoiki iwiniki o Yesus. **38** O Yesus womaidulu Ai poretoko, dé wamäke önanga iwiniki Unanga. Unanga wäleha, "Ngini nialingiri okia?" Onanga yohaluhu, "Rabi, kiaka Rabi anigogere?" (Ma demo 'Rabi' mamangarati guru.) **39** O Yesus wato, "Niaino niolega mahirete." Onanga yoiki dede Unanga dé yamäke kiaka Unanga wogogere. O öraha gënanga o takoro iata o bimaoa. O wange gënanga önanga yogogere dede Unanga. **40** Womatëngo, yahinoto manga hidogoronaka woihene okia o Yohanis wotemo ipaha winiki o Yesus, ganga o Andreas, o Simon Petrus aidodoto. **41** Womatai-taiti o Andreas wilingiri o Simon airiaka, dé wohingahu unangika, "Ngomi mima kamäkeoka de o Mesias!" (O Mesias kaima däene de o Kristus, enagënanga o Koano Wohi hohalamati.) **42** O Andreas wingotaka o Simon o Yesusika. O Yesus wipulo-pulono o Simon, dé witemo, "Ngonā o Simon, o Yona aingohaka. Ngonā aha inihetongo o Kefas." (O Kefas kaima däene de o Petrus mamangarati: o loku o helewo.) **43** Yarehino mawange o Yesus waputuhu woiki o Galileaika. Unanga imakamäke de o Filipus, dé wato unangika, "Naino nohi niki Ngohi!" **44** O Filipus aiahali o Betsaidaino, enagënanga ima teke berera moi o Andreas dé o Petrus. **45** O Filipus imamäke de o Natanel dé witemo unangika, "Ngomi miwi mäkeoka o nyawa kiaka o Musa wahetongoka ma Jou Madutu ai Tita ma Bukuoka, dé kiaka o nabi-nabi ihi abarioka. Unanga gënanga o Yesus Nazaretino, o Yusuf aingohaka." **46** Mä o Natanel wohaluhu, "Kaiyakunu maoa-oa moi iböa o Nazaretino?" O Filipus wohaluhu, "Naino lá nolega mahirete." **47** O Yesus wimäke o Natanel woböa, dé unanga wotemo mangale ünanga, "Niwilega, gënanga o Israeloka manyawa madutu. Koiwa o tengeluku unangoka." **48** "Sarakia Bapa nohinäko ngohi?" O Natanel woleha o Yesusika. O Yesus wohaluhu, "O Filipus woniahokuahi ngona, Ngohi toni mäkeoka ngona, o ara mautu matimiuku gënanga." **49** "Bapa Guru," o Natanel wato, "Bapa nagala ma Jou Madutu ai Ngohaka! Bapa o Israeloka manyawa manga Koano!" **50** O Yesus wato, "Ngonā nongaku, hababu duga-duga Ngohi tonihi ngahu Ngohi tonimäkeoka ngona o ara mautu matimiuku gënanga? Mahomoahi iholoi ilamoko de gënanga ngona aha namäke!" **51** O Yesus wotemooli, "Igoungu, nongaku,

ngona aha namäke o dihanga ihelenga, dé ma Jou Madutu ai malaekat-malaekat youti yodoa o Nyawa manga Ngohakuku."

2:1 O wange hinoto ipaha naga o kawingi maramanga o Kana mabereraka o Galilea matonakoka, dé o Yesus ngoi ayo naga genangoka. **2** O Yesus dé iwinönikö ya ahoko o rameangika gënanga. **3** Maöraha manga angguru imataka, o Yesus ngoi ayo mitemo o Yesusika, "To önanga manga angguru imataka." **4** O Yesus wohaluhu, "Ayo, uha nohihuloko ngohi. Maöraha yadonuahi ngohi tohimatoko ahi diri." **5** Mä o Yesus ngoi ayo mätemo o nyawa yolöleleanika, "Nia diai dika okia witemo nginika." **6** Gengoka naga o rube o gahumu butanga isadiaka ihi iho-ihoro manga lou imoteke o Yahudioka manga adati. O rube gënanga moi-moi madola done ho litere o ratuhu moi. **7** O Yesus wätemo yolöleleanika gënanga, "Nioguhe o rube-rube gënanga de o akere." Onangö yoguhe hiädono iomanga. **8** Dahao o Yesus watemo onangika, "Nialë o akere mahuhutulu gënanga dé niao o rameanga mahäekika." De önanga yao o akere gënanga o rameanga mahäekika, **9** dé unanga wataili o akere idadadioka o angguru. (Ma ünanga wohiorikua kiaino o angguru gënanga, duga-duga yolöleleani dika gënanga ihiöriki önanga yöguhe.) O rameanga mahäeke gënanga wiahoko o nauru wokawi-kawingi, **10** dé witemo unangika, "Mabiaha o nyawa yäguhe ihira o angguru i hëmo-hëmororo, dé nako önanga yokere yadugaka, dahao o angguru biaha. Mä ngona nagogonika o angguru duru mahëmo-hëmororo hiädono öraha nënanga!" **11** Gënanga o nonako ihëra-hëranga madodihiraka gënanga o Yesus, ünanga wodiai gënanga o Kana mabereraka o Galilea ma tonakoka. De o nonako gënanga ünanga wohimatoko toünanga aimulia. HÒ iwinöni niki iwingaku unangika. **12** I paha gënanga o Yesus woiki o Kapernaumika imakiniki de ngoi ayo, airoriadodoto de iwinönikö. De önanga yogogere dokengoka o wange muruono naga madekana. **13** Maöraha o Yahudioka manga Wange ma Amoko o Paskah itigioka, o Yesus woiki o Yerusalemika. **14** Ma Jou ai Tauoka o Yerusalemoka ünanga wämäke imahuku-hukunu o hapi, o duba, dé o namodara; de ihitotagali o tiwi yogogeruku genangoka. **15** O Yesus o dewili womadiai aigogohara moi

dé waduhu mata-mata aiwani gënanga, yaoa o duba, o hapi, ma Jou ai Tau magoronaka. Manga meja-meja o tiwi ihito tagali wabitikanga hiädono mangatiwi önanga hohibari-barihi kiaika honanga. **16** Daha ünanga watemo o namo dara yohuku-hukunika, "Niagoraka mata-mata nenangoka. Uha ahi Ama ai Tau, niadiai o bubukunu ma ngi!" **17** Iwinöni niki aha imahininga Ma Jou Ai Demo ma Buku mademo nënanga, "Ahi ngigo mangale ani Tau, ya Jou Madutu, yatuhuku ahihininga." **18** O Yahudioka manyawa yokokuaha iwitemo dema dohata o Yesusika, önanga yato, "Abeika nodiai ihëra-hëranga hokä o nonako ngomino, igoungu Ngona de anihaku nodiai hokonënanga." **19** O Yesus wohaluhu, "Niakilianga o Tau nënanga, dé o wange hange mahidogoronaka aha Tohigoko okali." **20** Dé onanga yato, "O taongo moruata de butangaino ihidailako mangale ihigoko ma Jou ai Tau nënanga. Dé ngona nomau nohigokokali o wange hange mahidogoronaka?" **21** Mä ma Jou ai Tau o Yesus aidungutu gangala airöehe mahirete. **22** HÒ maduruino, o Yesus womomikoka o honengino, ima hininga iwinöniniki o hali gënanga Unanga wohidodemoka. De yongaku önanga okia i tulihoka Ma Jou Ai Demo ma Buku magoronaka dé okia o Yesus wotemo-temoka. **23** Maöraha o Paskah ma Rameanga o Yesus naga o Yerusalemoka, de o nyawa mangangöe iwingaku Unangika, hababu wodiai o nonako ihëra-hëranga. **24** Mä o Yesus mahirete wangakua önanga, hababu Unanga wanäko o nyawa mata-mata. **25** Ngaro uha o nyawa iwihitararano Unangika o nagona dika, hababu Unanga mahirete wohiöriki okianaga o nyawa manga hininga magoronaka.

3:1 Naga womatëngo o agama mabaluhu o Farisioka manyawa, ai romanga o Nikodemus. **2** O hutu moiuku ünanga waika o Yesusika dé wotemo, "Bapa Guru, ngomi mihiöriki Bapa wonihuloko ma Jou Madutu. Hababu moiua yakunu yodiai ihëra-hëranga hokä Bapa nodiai, nako ma Jou Madutu witomotekua ünanga." **3** O Yesus wibaluhu, "Nongaku, o nyawa moiua yakunu yodadi ma Jou Madutu aiumati, nako ünanga womakilau wohigalioli." **4** "Sarakia o nyawa yobaluhoka yakunu imakilau ihigalioli," o Nikodemus wato o Yesusika, "Kaiyakunu ünanga

wowohamoli ngoiayo amimāmata magoronaika dé mihingohakoli?" **5** O Yesus wibaluhu, "Igoungu itiai ahidemo nēnanga: nako o nyawa imakilaua o akerino dé ma Jou Madutu ai Womahino, o nyawa gēnanga yakunua yodadi ma Jou Madutu ai sumati. **6** Nanga rōehe o nyawa inahikilau enagēnanga nanga dimono, mā de madodagi nanga rohani inahikilau de ma Jou Madutu ai Womaha. **7** Uha nohēranga nako Ngohi totemo: ngini mata-mata kiani nimakilau nihigalioli. **8** O hidaloko iwuwu kiaika ēnanga yakaika; ngone hoihene toēnanga maruruhu, mā hanākoua kiaino ibōa dé kiaika yakaika. Hoko genangō o nyawa yakilau ma Jou Madutu ai Womaha." **9** O Nikodemus woleha, "Sarakia gēnanga yakunu idadi?" **10** O Yesus wohaluhu, "Ngona o Israeloka manga guru; de sarakia ngona nohiorikua? **11** Nongaku: ngomi mihi ade-ade okia ngomi mianāko, dé ngomi mihidōaka o hakihi okia ngomi miamākeoka; mā ngini nioluku niatarima tongomi miahakihi. **12** Ngini ningakua nako Ngohi tohiade-ade nginika mangale o duniaino mahali; sarakia ngini yakunu ningaku, nako Ngohi tohiade-ade nginika mangale o horoga mahali? **13** Koiwahi o nyawa moiō yodoa o horogaile, mahomoa de ge Unanga woutioka o duniaku, enagēnanga o Nyawa manga Ngohaka. **14** Hokā imatero o Musa wohidōaka o dodiha tabaga de o gota mabooto o tonaka makokakahaka, hokogenangoli o Nyawa manga Ngohaka kiani iwihidoa, **15** hupaya mata-mata iwingaku Unangika yamāke o wowango madutu dé ikakali." **16** Karana ma Jou Madutu hokogēnanga wadora o nyawa o duniaka nēnanga, hiādono Unanga wohidōaka Ai Ngohaka woma tēngotēngoka, hupaya moi-moi o nyawa iwingaku Unangika yobinahaua, mā yamāke o wowango madutu dé ikakali. **17** Hababu ma Jou Madutu wihidingoto Ai Ngohaka wahukumua o dunia nēnanga, mā wohihalamati ēnanga. **18** O nyawa iwingaku Unangika yahukumua. Mā o nyawa iwingakua ma Jou Madutu wahukumoka, hababu Unanga iwingakua ma Jou Madutu ai Ngohaka womatēngotēngoka. **19** Unanga iwihiributu de mahohole nēnanga: O dararono gēnanga ibōaka o duniaka, mā o nyawa iholoi yoigo o huhutu ngaro de o dararono, hababu manga manarama ōnanga itorou. **20** O nyawa yododiai o dorou, yodohata o dararonika; de yoluku yaika o dararonika, hupaya manga manarama itotorou uha yamāke.

21 Mä o nyawa yamote-moteke ma Jou Madutu aimau, yaika o dararonika hupaya idadi itararano okia yodiaioka gënanga naga imamoteke de ma Jou Madutu aimau. **22** Ipaha de gënanga o Yesus dé iwinöniniki yoiki o Yudeaika. Unanga wogogere dokengoka öraha muruono naga madekana dede önanga dé waohiki. **23-24** Oraha gënanga o Yohanis iwihingohamuahi o buika. Unanga waohiki o Aionoka, ikurutikaua de o Salim, hababu dokengoka naga o akere iwöe. O nyawa yowöe yoböa unangika, dé unanga waohiki önanga. **25** Yamuruono naga o Yohanis iwinöniniki yomuläenge imateke ributu de o Yahudioka manyawa mangale o debi-debini madatoro. **26** Onanga yoiki o Yohanisika, de yato, "Bapa Guru, bote Bapa kanohiningahi, o nyawa de ngona Bapa o Yordan ma Ngairi mahonongaka gënanga, Bapa nomihimatokoka ngomino kahuruono? Orahanënanga Unangö waohiki, dé mata-mata o nyawa yoiki Unangika!" **27** O Yohanis wohaluhu, "O nyawa yamäkeua okianaga, nako ma Jou Madutu wahidöakua onangika. **28** Ngini mahirete ni ihenoka Ngohi totemo, 'Ngohi o Koano Wohihohalamatiua. Ngohi ihi huloko tihhiraino Unanga.' **29** O ngoheka mokawi-kawingi naga tomünanga aminauru wokawi-kawingi. O nauru wokawi-kawingi aidodiawo gënanga duga-duga womaoko witiniaile dé woihene, dé unanga womörene nako woihene o nauru wokawi-kawingi ai ilingi. Hokogenangö de ngohi. Orahanënanga ahihininga duru i sanangi. **30** Unanga duru kiani iholoi, wihiamo-amoko, dé ngohi kai dogo tokuranga." **31** Iböa-böa dakuku iholoi yatilakuru mata-mata. Iböa-böa o duniaino yaetongo o dunia manyawa, dé ihidemo mangale o dunia mahali. Iböa-böa dakuku iholoi yatilakuru mata-mata. **32** Unanga wotemo mangale okia wamäkeoka dé woihenoka, mä o nyawa moiua yangaku Ai hakihi. **33** O nyawa yangaku Ai hakihiika gënanga, yongaku ma Jou Madutu wotiai. **34** Hababu o nyawa ma Jou Madutu wahuloko ihingahu ma Jou Madutu aidemo, karena ma Jou Madutu ai Womaha mata-mata iwihidöakoka unangika. **35** O Ama wihininga ai Ngohaka, dé wihilapahioka hagala o kuaha Unangika. **36** O nyawa iwingaku-ngaku o Ngohakika gënanga, aha yamäke o ngango madutu de ikakali. Mä o nyawa iwihingounua ma Ngohakika gënanga yamäkeua o ngango. Onanga wahukumu ma Jou Madutu kahiado-adonika.

4:1 O Farisioka manyawa yoihene o Yesus wamāke dé waohiki iholoi yowöe de ngaro iwinöniniki o Yohanis. **2** (Kaimoteke madiai o Yesus mahirete wo ohikua duga-duga iwinöniniki dika.) **3** Maöraha o Yesus wohiöriki o Farisioka manyawa yoihenoka mangale o hali gënanga, Unanga wöiki o Yudeaika de womaidulu o Galileaika. **4** Ai dodagi mahidogoronaka gënanga Unanga kiani watilakuru o Samaria. **5** O Yesus womahiädono o berera moi o Samaria maromanga o Sikar, ikurutikaua de o tonaka mahira o Yakub wihidöaka aingohakika o Yusuf. **6** Genangoka naga o Yakub aihumu. O Yesus iwiboleoka duru karana imadagi, mangale gënanga Unanga wogogeruku o humu madatekoka. Oraha gënanga done howange ikorona, **7-8** dé iwinöniniki o Yesus yoikoka o bereraika yoiija o inomo. Ahao o Samaria manyawa mangoheka momatëngo moböa moma guiti o akere. O Yesus womitemo munangika, "Ayo, kai yakunu Ngohi toma gahoko tokere?" **9** O Samaria mangoheka gënanga mohaluhu, "Tuanga o Yahudioka manyawa, ngohi o Samaria manyawa; yadodoa Tuanga nogahoko nokere ngohino?" (Hababu o Yahudioka manyawa imateke rahaiua de o Samaria manyawa.) **10** O Yesus wohaluhu, "Nako ngona nohiöriki ma Jou Madutu aingongike dé o Naguna wogahoko wokere ngonaika, marai ngona mahirete nogahoko nokere Unangika, dé Unanga aha wonihidöaka ngonaika o akere mangango." **11** O ngoheka gënanga mato, "Tuanga koiwa anihia-hia, dé o humu nënanga duru kohalukuku. Okiaino Tuanga namāke o akere mangango? **12** O Yakub, miatohora ngomi, womihidöaka ngomi o humu nënanga. Unanga mahirete womalë o akere wokere nenangino; hoko genangoli aingoha-ngohaka de ai aiwani. Okia Tuanga natobote Tuanga iholoi nolamoko de o Yakub?" **13** O Yesus wato, "O nyawa yaokere o akere nënanga aha manga kiriti madudungoli," **14** "mä o nyawa yokere o akere aha Ngohi tahidöaka, manga kiriti madudungokaua kahiado-adonika. Hababu o akere aha Ngohi tahidöaka gënanga aha idadi o jobubu manga diri magoronaka ihahuru ihupu dé ihidöaka onangika o ngango madutu dé ikakali." **15** O ngoheka gënanga mato, "Tuanga, nohihidöaka ngohi o akere gënanga, hupaya ngohi ahikiriti madudungokaua; la ibötohi togogilio nenangino tolë o akere." **16** O Yesus wato, "Noiki, niahoko

anirokata, daha nainoli nangino." **17** O ngoheka gënanga mohaluhu, "Ngohi koiwa ahirokata." O Yesus wato, "Anidemo gënanga itiai." **18** "Hababu ngona nokawingoka nohigali mamotoa iböto, dé o nauru niwango dede ngona nënanga naga anirokatauahi." **19** O ngoheka gënanga mato, "Orahanënanga ngohi tohiöriki Tuanga Ngona o nabi moi." **20** "Tongomi miaete de miatohora iwihuba ma Jou Madutu o doporonoka nënanga, mä Tuanga ani nyawa yato, duga-duga o Yerusalemoka dika mangi o nyawa iwihuba ma Jou Madutu." **21** "Nongaku," o Yesus wato munangika, "öraha moiuku o nyawa aha iwihuba o Ama, o doporonokaua nënanga, dé o Yerusalem okauaö. **22** Ngini o Samaria manyawa niahuba okianaga ngini nianäkoua, mä ngomi o Yahudioka manyawa miahuba ënanga ngomi mianäko, hababu o halamati iböa o Yahudi manyawaka de yaino. **23** Mä maöraha aha iböa, dé iböaka de ma Jou Madutu ai Womaha makuaha o nyawa aha iwihuba o Ama hokä sarakia Unanga naga. Onanga aha yopuji de madiaioka, hokä o Ama woigo-igo. **24** Hababu ma Jou Madutu gënanga o Womaha, dé kade ma Jou Madutu ai Womaha dika makuaha, o nyawa yakunu iwi huba o Ama hokä sarakia Unanga naga." **25** O ngoheka gënanga motemo o Yesusika, "Ngohi tohiöriki o Koano Wohihohalamati (iwi hetongo o Kristus) aha woböa. Nako Unanga woböa, Unanga aha wohingahu hagala mata-mata ngoneino." **26** "Ngohi nanga Unanga," o Yesus wato, "Ngohi öraha nënanga homa ade-ade magogiria dede ngona." **27** Orahagënanga o Yesus iwinöniniki yoböa. Onanga yohëranga iwimäke o Yesus ima ade-ade de o ngoheka momatëngo. Mä komoiuaö onangino imileha o ngoheka gënanga, "Ayo aniparalu okia?" ekola iwileha o Yesusika, "Yadodoa Bapa nima ade-ade de o ngoheka gënanga?" **28** Ma ngoheka gënanga kama mala ami rube genangoka, dé moma popäta o bereraika dé mohingahu hagala o nyawa dokengoka, **29** "Niaino niwilegahi, womatëngo wohihingahu ngohino hagala mata-mata ngohi tadodiaioka. Bote Unanga gënanga o Koano Wohi hohalamati?" **30** Hagala o nyawa genangoka kayamala manga berera de yoiki o Yesusika. **31** Orahagënanga o Yesus iwinöniniki iwiahoko wolomo. Onanga yato, "Bapa Guru," "ika nolomohi." **32** O Yesus wohaluhu, "Naga o inomo Ngohioka, ngini nihiörikua." **33** Mä o Yesus iwinöniniki muläenge

imakeleha, "Bote naga o nyawa yoao o inomo mangale Unanga?" **34** Daha o Yesus wato, "Ahi inomo Ngohi ganga tamoteke Ai mau Unanga wohihulo-huloko Ngohi, dé tohitotomo o manarama wohihilapahioka Ngohino. **35** Ngini niato, 'O mede iatohi o gugutuku maöraha.' Mä Ngohi tinitemo nginika: Niapulono o dumule-o dumule ikuratioka, imahidiai mangale iutuku! **36** O nyawa youtu-utuku imuläenge yodahongo manga hewa dé yototoomu mahohoko mangale o ngango madutu dé i kakali. Hiädono yodato-datomo dé youtu-utuku yakunu yokokimörene. **37** Ohi ade nänanga de madiaioka, 'Moi yodatomo, mahomoa youtuku.' **38** Ngohi tinihuloko ngini nioiki niutuku o dumuleika ngini nitumuleua, o nyawa mahomoa yomanaramoka dokengoka, dé ngini niö dahongo mautumu to önanga manga manaramino." **39** Manga ngöe o Samaria manyawa o bereraka gänanga iwingaku o Yesusika, hababu o ngoheka gänanga mato, "Unanga wohihi ngahu ngohino hagala mata-mata ngohi tododiaioka." **40** Maöraha o Samaria manyawa gänanga imakamäke de o Yesus, önanga yogahoko duru iwiributu, hupaya Unanga wogogerohi dede önanga. HÒ o Yesus wogogere genangoka o wange hinoto madekana. **41** Maduruino iholoi yowöeoli o nyawa iwingaku o Yesusika, hababu okia wadotoko mahirete onangika. **42** Onanga yotemo o ngohekaika gänanga, "Ngomi mingaku örahanänanga, igoungua hababu okia nomihi ngahu ngomino, mä karana ngomi mahirete mi ihenoka mangale Unanga, dé mihiöriki Unanga igoungu o dunia Wohi hohalamati." **43** O wange hinoto ipaha wogogere o Sikar, o Yesus woiki o Galileaika. **44** O Yesus mahirete wotemoka, "O nabi womatängo iwihoromatiua toünanga aiberera madutuoka." **45** Mä maöraha Unanga womahiädono o Galileaika, o nyawa manga ngöe dokengoka iwibuhuku de manga hininga imore-morene, hababu önanga naga o Yerusalemoka yamäkeoka mangöe o Yesus wodiai o Paskah ma Wange ma Amokoka. **46** Ahao o Yesus womaidulu o Kana mabereraika o Galilea ma tonakoka, kiaka Unanga wohidadioka o akere idadi o angguru. O Kapernaumoka naga womatängo o kadatoka womomanarama aingohaka wopanyake. **47** Mä oraha ünanga woihene o Yesus woböa inoka o Galileaka o Yudea de waino, ünanga woiki o Yesusika dé wogahoko o Yesus waika o Kapernaumika la wihitogumu aingohaka

ngadeke wohonenge. **48** O Yesus witemo o kadatoka womomanaramika gënanga, "Nako niamäkeuahi ihëra-hëranga, ngini ningakua." **49** "Tuanga," o kadatoka womomanarama wohaluhu, "itaiti noböa ahingohaka wohonenguahi de." **50** O Yesus witemo unangika, "Noiki, aningohaka wotogumoka." O nyawa gënanga wangaku o Yesus aidemoika, dé unanga woiki. **51** O ngëkomo mahidogoronaka, iwilöleleani yoböa unangika dé iwihingahu, "Ani ngohaka Tuanga wotogumoka." **52** Daha ünanga wäleha onangika, o takoro muruono o ngohaka gënanga muläenge wotogumu. Onanga yohaluhu, "Kanugono mudukua hotakoro moi o wange ikorona aigogama ihihanga." **53** Daha o ngohaka aiama gënanga wohininga maöraha hokogënanga o Yesus wotemo unangika, "Ani ngohaka wotogumoka." HÒ unanga dé aita madola iwingaku o Yesusika. **54** Gënanga o nonako ihëra-hëranga mahinoto o Yesus wodiai o Galileaka, maöraha Unanga o Yudea de waino.

5:1 Iböto de gënanga, naga o Yahudioka manga wange ma ago-agomo, o Yesus woiki o Yerusalemika. **2** O Yerusalem "O Duba ma Ngorana" madatekoka naga o akere malupanga moi, de o Ibranioka manga demo ihiromanga Betesda. Genangoka naga o kamari motoa. **3** De o kamari-kamari gënanga manga ngöe o nyawa yopopanyake imaiduoka; naga yopiloko, yosuga dé naga yolugu. Onanga mata-mata yödamä o akere malupangoka iluluaka. **4** Hababu naga mamoi-mamoi ma Jou aimalaekat iuti o akere malupanguku gënanga dé yaluluaka ma akere. Dé o nyawa yopopanyake madodihiraka yowohama o lupanguku gënanga maöraha o akere iluluaka aha yotogumu o panyake okia dika önanga yadäene. **5** O ngioka gënanga naga o nauru womatëngo wopopanyake o taongo moruange de tufange madekana. **6** O Yesus wimäke ünanga woma iduoka dokengoka, dé wohiöriki ünanga duru kaidekana wopanyake; o Yesus wileha unangika, "Noigo ngona notogumu?" **7** O nyawa wopopanyake gënanga wohaluhu, "Bapa, moiua o nyawa nenangoka ihinoa ngohi o akere malupanguku maöraha ma akere iluluaka. Dé maöraha ngohitameta o akere malupangika, o nyawa mahomoa yohiraka imanoa." **8** O Yesus witemo unangika, "Nomomiki, nagoraka anitikara dé noma dagi." **9** De

öraha gënanga dika o nyawa gënanga wotogumoka. Unanga wagoraka aitikara dé womadagi. O hali gënanga idadi o Yahudioka manga Puji mawangeoka. **10** Hababu gënanga o Yahudioka manyawa yokokuaha, iwitemo o nyawa aha wotogumino gënanga, "O wange nënanga o Puji ma wange. Ngona iyakunua nao anitikara." **11** Mä o nyawa gënanga wohaluhu, "O nyawa wohihitogu-togumu ngohi kangano wohihuloko ngohi tagoraka ahitikara dé toma dagi." **12** Yoleha önanga, "O naguna gënanga wonihuloko ngona nagoraka ani tikara dé noma dagi?" **13** Mä o nyawa wotogu-togumoka gënanga wohiorikua o nyawa nagona, hababu o Yesus womahiangoka o nyawa yowöe-wöe manga hidogoronaka gënanga. **14** Maduruino o Yesus imamäke de o nyawa gënanga ma Jou ai Tau magoronaka, dé witemo unangika, "Oraha nënanga ngona notogumoka. Uha nobaradohali, hupaya uha naohana o hali iholoi itorou." **15** De woiki o nyawa gënanga, daha wohingahu o Yahudioka manyawa yokokuahaika o Yesus wihitogumu. **16** Dé mahababu gënanga, önanga ihidailako iwianiaya o Yesus, hababu Unanga wahitogumu o nyawa o Yahudioka manga Puji mawangeoka. **17** Mä o Yesus watemo onangika, "Ahi Ama hokogenangika womanarama hiädono öraha nënanga, dé Ngohiö tomanarama." **18** Ai demo-demo gënanga idadi o Yahudioka manyawa yokokuaha duru ihidailako la iwitoma. Onanga yodiai gënanga, igoungua hababu Unanga watilakuru o agama madatoro mangale o Yahudioka manga Puji mawange, mä hababu Unanga wotemo ma Jou Madutu gënanga ai Ama; mangarati Unanga womahitero Ai diri de ma Jou Madutu. **19** O Yesus wohaluhu hagala o nyawaika gënanga hokonënanga, "Ningaku, o Ngohaka gënanga okia-kiaua wakunu wodiai de Ai kuaha mahirete. Unanga duga-duga wodiai okia Unanga wamäke de wadiai ma Ama. Hababu okia ma Ama wadiai hokogenangö ma Ngohaka wadiai. **20** Hababu ma Ama wihininga ma Ngohaka dé wihi matoko Unangika mata-mata wadiaioka mahirete. De ma Ama aha wihimatoko Unangika o manarama-o manarama iholoi i lamokoli, hiädono mata-mata yohëranga. **21** Ma Ama gënanga wahi momiki o nyawa yohonengoka, dé wahidöaka önanga o ngango madutu dé ikakali; hokogenangoli ma Ngohaka wahidöaka o ngango ikakali hagala o nyawaika yoigo yahidöaka o

ngango. **22** Ma Ama mahirete wahihakimua o nagona dika. Hababu mata-mata kuaha mangale wahihakimi wihilapahioka Ai Ngohakika. **23** Ma Ama wodiai gënanga, hupaya mata-mata o nyawa iwihoromati ma Ngohaka hokä önanga iwihoromati ma Ama. O nyawa iwihoromatiua ma Ngohaka, iwi horomatiuaö, o Ama wihulo-huloko ma Ngohaka. **24** Igoungu itiai Ahiade-ade nënanga: O nyawa yohininga hagala Ahidemo dé iwingaku Unangika wohihulo-huloko Ngohi, o wowango madutu dé ikakali kato önanga. Onanga aha yahukumua; önanga yolapahioka de o honenge dé yamäke o wowango. **25** Ningaku: Aha iböa maöraha -- de yadonoka maöraha -- o nyawa yohonengoka aha yoihene Ai ilingi ma Jou Madutu ai Ngohaka. Dé o nyawa yoihe-ihene aha yowango. **26** Hokä o Ama mahirete o ngango matiti, Unanga wihidadi Ai Ngohaka o ngango matitioli. **27** Unanga wihidökoka Ai Ngohakika o haku mangale wahihakimi hababu Unanga o Nyawa manga Ngohaka. **28** Uha ngini nihëranga niihene o hali nënanga, hababu maöraha aha iböa o nyawa mata-mata yohone-honengoka yoihene Ai ilingi, **29** daha yohupu o lungunino. O nyawa yododiaioka o oa aha yomomiki mangale o ngango. Mä o nyawa yododiaioka o dorou, aha yomomiki mangale yahukumu." **30** "Ngohi takunua todiai okianaga imoteke Ahi hininga mahuka mahirete. Ngohi duga-duga tahihakimi imamoteke de ma Jou Madutu aipareta. Dé ahiputuhu Ngohi iadili, hababu Ngohi tamotekua Ahi hininga mahuka mahirete, mä Ai hininga mahuka o Ama wohihulo-huloko Ngohi. **31** Demo hohiade Ngohi mahirete tohidöaka o hakihi mangale Ahi diri, o hakihi gënanga yakunua yangaku. **32** Mä naga o nyawa mahomoa ihidöaka o hakihi mangale Ngohi, dé Ngohi tohi öriki manga hakihi gënanga itiai. **33** Ngini nia hidingoto nia huhuloko o Yohanisika, dé unanga wohi döakoka o hakihi madiiai mangale Ngohi. **34** O hali nënanga Ngohi totemoka, Ngohi tolingirua o hakihi o nyawaino, mä hupaya ngini inihihalamati. **35** O Yohanis gënanga hokä o hilo iwango dé i tararono madararono. O raha mahuhutulu ngini nimörene nio dahongo o dararono gënanga. **36** Mä ahi hakihi Ngohi i holoilamoko de o Yohanis ai hakihi. Okia öraha nënanga Ngohi todiai, enagënanga o manarama wohihi döakoka o Ama Ngohino, manyonyata o Ama wohi huloko Ngohi. **37** Dé

o Ama wohi huloko Ngohiö, wohi döaka o hakihi mangale Ngohi. Ngini ni ihenuahi Ai ilingi, ekola de niwi mäke uahi Ai rupa. **38** Ai demo niagogonua niahininga magoronaka, hababu ngini nihingakua Ngohino, Unanga wohihuloko. **39** Ngini nima dotoko Ma Jou Ai Demo ma Buku madola, hababu niatobote de mangëkomo gënanga ngini niamäke o ngango madutu dé ikakali. Dé Ma Jou Ai Demo ma Buku mahirete gënanga ihidöaka o hakihi mangale Ngohi. **40** Mä ngini nioluku niaino Ngohino la niamäke o ngango ikokakali. **41** Ngohi tolingirua o horomati o nyawaino. **42** Ngohi tininako ngini. Ngohi tinihiöriki ngini niwihiningaua ma Jou Madutu niahininga magoronaka. **43** Ngohi toböa de Tongohi Ahi Ama aikuaha, ngaro hokogënanga ngini nihitarimaua Ngohi. Mä nako o nyawa mahomoa yoböa de manga kuaha mahirete, ngini niaigo niatarima önanga. **44** Sarakia ngini iyakunu ningaku, nako ngini nilingiri o higiriri niadodiawo o nyawaino, dé nimahiahaua nialingiri o horomati ma Jou Madutu woma Tëngo-tëngokaino? **45** Uha niatobote Ngohi aha tinihihowono ngini Ahi Ama aihimangoka. Aha winihihowono ngini ganga o Musa, ünanga ngini niwingano-nganono. **46** Demo hiade ngini niwingaku o Musaika, ngini aha nihi ngaku Ngohino, hababu mangale Ngohi ünanga watulihi. **47** Mä nako ngini niangakua okia o Musa watulihoka, sarakia ngini iyakunu ningaku okia Ngohi totemoka?"

6:1 Iböto de gënanga o Yesus womaidulu o Galilea ma Taaga mahonongaika, yahetongo Tiberias ma Taaga. **2** De womahi ädono dokengoka, o nyawa manga ngöe iwininiki Unanga, hababu önanga yamäkeoka ihëra-hëranga wadiai, de wahitogumu o nyawa manga ngöe yopopanyake. **3** O Yesus wodoa o doporonile, daha Unanga wogogeruku genangoka de iwinöniniki. **4** Oraha gënanga, o Yahudioka manga Wange ma Amoko o Paskah itigioka. **5** Maöraha o Yesus womalega iwikilolitino, Unanga wamäke o nyawa de kamanga doduduono yoböa Unangika. De Unanga witemo o Filipusika, "Kiaika ngone hakunu hoija o inomo, hupaya mata-mata o nyawa nënanga yakunu yolomo?" (**6** O Yesus wotemo hokogënanga hababu Unanga womau wiuji o Filipus; hababu Unanga mahirete wohiorikoka okia aha wodiai.) **7** O Filipus wohaluhu, "O roti

maiya o tiwi o haäka o ratuhu hinoto aha imakadonua, o nyawa manga ngöe nänanga, ngaroka o nyawa moi duga-duga yamäke mahuhutulu dika." **8** Womatängo iwinönikiki o Yesus mahomoa enagänanga o Andreas, o riadodoto de o Simon Petrus wato, **9** "Nenangoka naga o ngohaka o nauru womatängo airoti motoa de o nawoko o ngai hinoto. Mä okia mamangarati gänanga mangale o nyawa manga ngöe nänanga?" **10** O Yesus wato, "Niahuloko o nyawa mata-mata gänanga yogogeruku." O ngi gänanga naga o momo koharubu, hö hagala o nyawa gänanga yogogeruku o momoka -- mata-mata naga mudukua yaribuhu motoa o nyawa o nau-nauru dika. **11** Dahao o Yesus walë o roti gänanga, wosukur ma Jou Madutuika. Iböto de gänanga Unanga wahikodoku o roti gänanga o nyawa yowöe-wöeika. Ipaha Unanga wahikodoku o nawoko gänanga, de önanga yaolomo koyamatakua. **12** Ipaha mata-mata yolomo hiädono yapunuhu, o Yesus watemo iwinönikiki, "Niatoomu maboloi o inomo gänanga; uha hiädono naga iumo." **13** Daha önanga yatoomu o karaja ngimoi de hinoto iomanga, maboloi o inomo, o roti motoa yaolomo o nyawa yowöe-wöe gänanga. **14** Maöraha o nyawa yowöe-wöe yamäke ihëra-hërange o Yesus wadiai, önanga yato, "Igoungu, ne Unanga o Nabi hingano-nganono woböa o duniaino!" **15** O Yesus wohiöriki önanga yomau yaino iwiributu Unanga wodadi toönanga manga koano. Mangale gänanga woiki Unanga womahiditoko madaera dema dodoporonokaika. **16** Muläenge yohutu, o Yesus iwinönikiki youti o taagauku. **17** De yoharene o ngotiri yatoaka o taaga gänanga yoiki mahonongaika yameta o Kapernaum mabereraika. O wange yohutuoka, mä o Yesus ma kowoböauahi onangika. **18** Oraha gänanga o taaga imuläenge ilolopaka hababu o rato. **19** Yohidete done hokilo motoa ekola butanga magurutika, önanga iwimäke o Yesus woböa manga ngotirika womadagi o akere malokuika. Onanga duru yohawana. **20** O Yesus watemo onangika, "Uha nihawana, nänanga Ngohi!" **21** Dé manga hininga imore-morene önanga iwibuhuku Unanga woharene o ngotiruku magoronaile, dé oraha gänanga dika manga ngotiri önanga gänanga imahi adonoka o ngi manga metaika. **22** Yarehino mawange o nyawa manga ngöe kayogogogerohi o taaga mahonongaka, yamäke hokokangano duga-duga naga ngotiri moi dokengoka. Onanga ihiöriki o

Yesus iwinöniniki yopahaka de o ngotiri gënanga, enahioko o Yesus wonikua. **23** Daha ino o ngotiri muruono naga o Tiberiasino imaleotino imahi tigi-tigiha de o ngi kiaka o nyawa yowöe-wöe gënanga yolomo o roti ma Jou wosukur de i böto. **24** Maöraha o nyawa yowöe-wöe gënanga iwimäke o Yesus de iwinöniniki genangoka koyaiwa, onangö yoharene o ngotiroko dé yoiki o Kapernaumika iwilingiri o Yesus. **25** Maöraha o nyawa manga ngöe-ngöe gënanga imakamäke de o Yesus o taaga mahonongaka, önanga iwileha Unangika, "Bapa Guru, hokokia Bapa nimahiädono nenangino?" **26** O Yesus wohaluhu, "Igoungu, ngini nihilingiri Ngohi igoungua hababu ngini nimangaratioka madodagi ihërahëranga Ngohi tadiai, mä karana ngini niolomoka hiädono inipunuhu. **27** Uha nimanarama mangale niamäke o inomo iyakunu imata de imela. Nimanarama mangale niamäke o inomo iyakunua iamiri dé inihi döaka o ngango madutu dé ikakali. O inomo gënanga aha winihi döaka o Nyawa manga Ngohaka nginika, hababu Unanga witedeoka ma Jou Madutu o Ama." **28** Daha önanga iwileha Unangika, "Ngomi kiani midiai okia la mia moteke ma Jou Madutu aihininga mahuka?" **29** O Yesus wohaluhu, "Nënanga ma Jou Madutu woigo nginino: niwingaku Unangika wihulohuloko ma Jou Madutu." **30** Onanga yato, "Nako hokogënanga," "manyonyata okia iyakunu Bapa nomihidöaka hupaya ngomi miamäke dé miningaku Ngonaika Bapa? Okia Bapa aha nodiai?" **31** Miaete de miatohora ngomi yolomo o manna o tonaka makokakahaka, hokä Ma Jou Ai Demo ma Buku magoronaka itulihoka, "Unanga wahidöaka önanga yolomo o roti o horogauku." **32** Daha o Yesus watemo onangika, "Igoungu, kiani ningaku; o Musaua, mä Tongohi ahi Ama winihidöaka nginika o roti ma gou-goungu o horogauku. **33** Hababu o roti winihidöa-döaka ma Jou Madutu ganga Unanga o horogaka de wouti dé wohidöaka o wowango o nyawaika o duniaka." **34** Onanga yato, "Bapa," "nomihidöaka ngomino hokogenangika o roti gënanga." **35** "Ngohi o roti ihidöaka o ngango," o Yesus wato onangika. "O nyawa yoböa Ngohino aha yahahinokaua kahiado-adonika. Dé o nyawa ihingaku Ngohino aha manga kiriti madudungokaua kahi ado-adonika." **36** "Mä hokä Ngohi totemoka nginika, ngaro ngini nihimäkeoka Ngohi, ma ngini ningakua. **37**

O nyawa mata-mata o Ama wohidöaka Ngohino, aha yoböa Ngohino. Ngohi tatilaua o nagona honanga yoböa Ngohino. **38** Hababu Ngohi touti o horogaka de tauku, tamotekua Ahi hininga mahuka mä Ai hininga mahuka Unanga wohihulo-huloko Ngohi. **39** Dé nenangala Ai mau Unanga wohihulo-huloko Ngohi: hupaya o nyawa wohihidöa-döakoka Ngohino, kamoio de yohihangua; mä hupaya Ngohi tahimomiki önanga o Kiamati ma Wangeoka. **40** Hokonenangala, Tongohi ahi Ama Ai mau: Hupaya mata-mata iwimäke o Ngohaka dé iwingaku Unangika, o ngango madutu dé ikakali katoönanga, dé Ngohi tahiwangokali o Kiamati ma Wangeoka." **41** O Yahudioka manyawa muläenge yokurubungu o Yesusika, hababu Unanga wato, "Ngohi o roti o horogauku iuti". **42** Onanga yato, "Koigoungua o Yesus nänanga, o Yusuf aingohaka? Ngomi mianäko ngoi ayo de Ai ama! Sarakia Unanga yakunu wotemo Unanga wouti o horogaka de wauku?" **43** Daha o Yesus wätemo onangika, "Uha nikurubungu. **44** O nyawa moiö de koiwa yakunu yoböa Ngohino, nako o Ama wohihulo-huloko Ngohi, wä aoua önanga Ngohino; dé o nagona yoböa, aha tahimomiki o Kiamati ma Wangeoka. **45** O Nabi-nabi manga Buku magoronaka naga itulahi hokonänanga, 'Mata-mata o nyawa aha wädotoko ma Jou Madutu.' HÖ mata-mata o nyawa iwihhi gihene o Ama dé imadotoko Unangino, yoböa Ngohino. **46** Gänanga koiwa mamangarati naga o nyawa iwimäkeoka o Ama. Duga-duga Unanga woböa-böa ma Jou Madutuino, wimäkeoka o Ama. **47** Igoungu, nihiöriki: O nyawa yongakungaku, o ngango madutu dé ikakali katoönanga. **48** Ngohi o roti inihidöaka o ngango. **49** Niaete de niatohora yolomo o manna o tonaka makokakahaka dé onanga kayohonenge dika. **50** Mä hokogenangua o roti iuti-uti o horogauku; o nyawa yaolomo o roti gänanga aha yohonengua. **51** Ngohi o roti iuti-uti o horogauku -- o roti ihidöa-döaka o ngango. O nyawa yolomo o roti nänanga aha yowango kahiado-adonika. Roti Ngohi aha tahidöaka ganga Tongohi ahi akeme mangale o dunia mawowango." **52** Yoihene gänanga, o Yahudioka manyawa imateke ributu moi de moi. "Sarakia o nyawa nänanga wakunu wonahidöaka Ai akeme ngoneino la haolomo?" önanga yato. **53** Daha o Yesus watemo onangika, "Igoungu, ningaku: Nako ngini niaolomua o Nyawa manga Ngohaka Ai akeme dé

niaokerua Ai awunu, ngini aha igou-goungu niwangoua. **54** O nyawa yaolomo Tongohi Ahiakeme dé yaokere Tongohi ahiawunu o wowango madutu dé i kakali katoönanga, dé Ngohi aha tahimomiki o Kiamati ma Wangeoka. **55** Hababu Ahi akeme Tongohi o inomo magoungu, dé Ahi awunu Tongohi, o akere magoungu. **56** O nyawa yaolomo Tongohi Ahi akeme dé yaokere Ahi awunu, yotatapu kamoï dede Ngohi, dé Ngohi de önanga. **57** O Ama wowango-wango gënanga, wohihuloko Ngohi dé Ngohiö towango o Amaino. Hokogenangö o nyawa yaolomo Tongohi ahiakeme, aha yowango Ngohino. **58** Nënanga o roti iuti-uti o horogauku: o roti hokä yaolo-olomua niaete de niatohora. Karana yaolomo iböto o roti gënanga, önanga kayohonenge dika. Mä o nyawa yaolomo o roti nënanga, aha yowango kahi ado-adonika." **59** Mata-mata gënanga o Yesus wotemo maöraha Unanga wädotoko o pupuji matauoka o Kapernaum mabereraka. **60** Yoihene iböto Ai demo-demo o Yesus gënanga, manga ngöe iwinöniniki manga hidogoronaka yotemo, "O dodötoko nënanga duru i tubuhoholi. O nagona yakunu yoihene!" **61** O Yesus mahirete wahiöriki iwinöniniki yokurubungu o hali gënanga. Ma Unanga wätemo, "Okia ngini niahininga yadäenua karana o demo-demo gënanga? **62** Sarakia idadi done, nako ngini niwimäke o Nyawa manga Ngohaka wodoa wolio Ai ngi i hira-hiraile? **63** Yadiai o nyawa yowango genangala ma Jou Madutu ai Womaha. O nyawa manga kuata koiwa mafaidä. O demo-demo Ngohi tohiadonoka nginika nënanga, ganga ma Jou Madutu ai Womaha mademo-demo de o demo ihidödöa-döaka o ngango. **64** Ngaro hokogënanga nagaö niahidogoronaka ngini yongakua." (O Yesus wohiorikoka mahirahi o nagona honanga yoluku yongaku, dé o nagona aha iwihipongono.) **65** Daha o Yesus wätemo wohigalioli, "Hababu gënanga, Ngohi tinihi ngahuoka nginika o nyawa kamoïua yakunu yoböa Ngohino, nako o Ama kowahigumalaua." **66** Muläenge öraha gënanga manga ngöe iwinöniniki iwimala Unanga, dé yolukoka iwiniki Unanga. **67** Daha o Yesus waleha iwinöniniki yangimoi de yahinotoika, "Boteka nginiö nimau nihimala Ngohi?" **68** O Simon Petrus wato Unangika, "Jou," "o nagonaika ngomi aha mioiki? Anidemo Jou ihidöaka o ngango madutu dé ikakali. **69** Ngomi duru mingakuoka de mihigoungu Jou Ngonä o

huhuloko i tebi-tebini ma Jou Madutuino." **70** O Yesus wohaluhu, "Mode koigoungua tini iriki ngini o nyawa iningimoi de nihinoto nēnanga? Ngaro hoko gēnanga, womatēngo nia hidogoronaka ngini naga o womaha madorou!" **71** O Yesus ai dumutu enagēnanga o Yudas o Simon Iskariot ai ngohaka. Hababu ngaro o Yudas o nyawa womatēngo o Yesus iwinōniniki yangimoi de yahinoto manga hidogoronaka, ünanga aha wosetiaua o Yesusika.

7:1 Ipaha de gēnanga o Yesus woiki okiaika honanga o Galilea matonakoka. Unanga wöluku o Yudea madaeraika hababu o Yahudi manyawa yokokuaha yomau iwitoma Unanga. **2** O raha gēnanga itigioka o Wange ma Amoko o Tau-tau ihikatu o Hoka-hoka. **3** O Yesus airoriadodoto iwitemo o Yesusika, "Namala, o ngi nēnanga dé noiki o Yudeaika, hupaya ininōniniki yakunu yamākeō Ani manarama. **4** Koiwa naga o nyawa aha yaiunu okia Unanga wadai, nako Unanga woigo wodadi duru iwināko. Nako Ngona nadi ai hagala parakara hokogēnanga, o dunia ingodumu kiani ihiōriki!" (**5** Hababu Ai roriadodoto mahireteō iwingakua Unangika.) **6** O Yesus wato onangika, "Maōrahauahi mangale Ngohi," "mä mangale ngini, ōraha mahigetongo iyakunu. **7** O dunia nēnanga yakunua inidohata ngini. Mä Ngohi igoungū ihidohata o dunia, hababu Ngohi hokogenangika tohidaaere o duniaika mangale mamanarama itotorou. **8** Nioiki ngini mahirete o rameangika gēnanga. Ngohi toikua hababu maōraha yadonuahi mangale Ngohi." **9** Hoko gēnanga o Yesus wātemo Ai roriadodotika, dé Unanga kawogogogere o Galileaka. **10** Ai roriadodoto yopahaka yoiki o rameangika gēnanga, o Yesus womatēngo woiki kawomahihanga o nyawa ma iwihiorikua. **11** O rameanga madekana gēnanga, o Yahudioka manyawa yokokuaha iwilingiri Unanga dé yoleha-leha, "Kiaka Unanga?" **12** O nyawa manga ngōe mulāenge imakokuhudu mangale Unanga. Naga utu yotemo, "Unanga o nyawa maoa." Nagaō yotemo, "Kowali! Unanga wahirehene o nyawa manga ngōe." **13** Mä o nyawa moiua yobarani yoade-ade ihitotararonika mangale Unanga hababu ōnanga yāmodongo o Yahudi manyawa yokokuahaika. **14** O rameanga magogiriaka, o Yesus wowohama ma Jou ai Tau

magoronaika, daha muläenge wädotoko. **15** O Yahudioka manyawa yokokuaha yohëranga duru dé yato, "Sarakia o nyawa nënanga yakunu wohiöriki hokogënanga mangöe, enahioko Unanga komaiwa wohakola?"

16 O Yesus wohaluhu, "Ngohi todotoko nënanga igoungua Ahi dodötoko, mä aidodötoko Unanga wohihulo-huloko Ngohi. **17** O nyawa yoigo yamoteke ma Jou Madutu aimau aha ihiöriki okia ino Ahi dodötoko iböa ma Jou Madutuino ekola Ngohino mahirete. **18** O nyawa ihidöaka manga dodötoko mahirete yolingiri o horomati mangale manga diri mahirete. Mä o nyawa yolingiri o horomati mangale Unanga wähulo-huloko, o nyawa gënanga yorikoto, de o tipu koiwa onangoka. **19** Mode koigoungua o Musa wohi döaka ma Jou Madutu hagala aipareta-pareta nginika? Mä niahidogoronaka ngini koiwa yamoteke o pareta-pareta gënanga. Yadodoa ho ngini niato nihitoma Ngohi?" **20** O nyawa yowöe-wöe gënanga yohaluhu, "Ngoni inatogohanga! O nagona yomau initoma Ngoni?" **21** O Yesus wohaluhu, "Duga-duga o manarama moi Ngohi tadiai o Puji mawangeoka, dé ngini nihëranga. **22** O Musa wohidöakoka nginika o datoro mangale o huna -- ngaro o huna gënanga imoteke madiyai ma ahali o Musainoua, mania dimo-dimono yohira-hiraino kiaka o Musa ma koiwiwahi. Karana gënanga, o Puji mawangeö ma ngini kaniahuna o nyawa. **23** Nako ngini niadiyai gënanga hupaya uha niatilakuru o Musa aidatoro mangale o huna, yadodoa ho ngini nihingamo Ngohino hababu Ngohi tahitogumu o nyawa manga röehe mata-mata o Puji mawangeoka? **24** Uha niahihakimi o nyawa imoteke okia niamäke, mä i moteke de ma adili." **25** Ma duruino naga yamuruono naga o Yerusalem manyawa yotemo, "Mode koigoungua ne Unanga manyawa magogiria iwilingiri yato iwitoma? **26** Niwi lega Unanga wotemo-temo o nyawa yowöe-wöe manga himangoka, dé madagahanga koiwa dé okia-kiaua naga yotemo Unangika! Boteka nanga balu-baluhu ngone ihi örikoka Unanga nënanga o Koano Wohi hohalamati? **27** Mä nako o Koano Wohi hohalamati gënanga woböa, o nyawa moiuaö ihiöriki kiaino Ai ahali! Enahioko ngone hohiöriki o nyawa nënanga Ai ahali okiaino." **28** Ipaha o Yesus wädotoko magogiriaka ma Jou ai Tau magoronaka, Unanga wotemo de Ai ilingi ma ago-agomo, "HÖ ngini nihiöriki o nagona Ngohi nënanga, dé okiaino Ahi

ahali? Ngohi toböaua imoteke Ahi hininga mahuka mahirete. Ngohi wohihuloko mangale Unanga Ai haku wohihuloko Ngohi, dé Unanga iyakunu iwingaku. Mä ngini niwinäkoua Unanga. **29** Ngohi tinäko Unanga, hababu Ngohi ahi ahali Unangino, dé Unanga wohihuloko Ngohi." **30** Oraha gënanga önanga yomau iwitagoko o Yesus, mä moiua yobarani iwisö Unanga, hababu maöraha yadonuahi. **31** O nyawa yowöe-wöe manga hidogoronaka gënanga, manga ngöe yomuläenge iwingaku Unangika, dé yotemo, "Nako o Koano Wohihohalamati gënanga woböa, Unanga wakunu wodiai iholoi iwöe ihëra-hëranga ngaro de o nyawa ne Unanga?" **32** O Farisioka manyawa yoihene sarakia o nyawa yowöe-wöe gënanga imakokuhudu mangale o Yesus. Karana gënanga, imakiniki de o imam-imam manga häeke, önanga yähuloko yamuruono naga ma Jou ai Tau magogöana yoiki iwitagoko o Yesus. **33** O Yesus watemo o nyawa yowöe-wöeika ma Jou ai Tau magoronaka, "Duga-duga öraha mahuhutulokahi dika Ngohi dede ngini. Ipaha de gënanga Ngohi aha tolio wohihulo-hulokika Ngohi. **34** Ngini aha nihilingiri Ngohi, mä nihimäkeua Ngohi; hababu ngini niyakunua niädono o ngi kiaka Ngohi naga." **35** Daha o Yahudioka manyawa yokokuaha imaketemo moi de moika, "O nyawa nënanga womau okiaika woiki hiädono ngone hakunua himäke Unanga? Bote Unanga womau woiki o Yahudi manyawaika yogogogere o berera maporetoka o Yunani manyawa manga hidogoronaka, dé wadotoko o Yunanioka manyawa? **36** Okia Ai dungutu gënanga howotemo ngone aha hilingiri Unanga mä hakunua himäke de ngone hakunua haika o ngi kiaka Unanga naga?" **37** Owange mabobaha marameanga gënanga, enagënanga ma wange duru ilamoko, o Yesus womaokoino ma Jou ai Tau magoronaka daha wopöaka, "O nyawa manga kiriti madudungu kokiani yaino Ngohino la yokere. **38** Mangale o nyawa ihingaku Ngohino, itulihoka Ma Jou Ai Demo ma Buku, 'Manga hininga magoronaino iuihi ihahahuru o akere ihidöa-döaka o ngango.' " (**39** O Yesus wohiade-ade mangale ma Jou Madutu ai Womaha, aha yatarimao nyawa iwingaku-ngaku Unangika. Hababu o öraha gënanga ma Jou Madutu ai Womaha wohidöakuahi; hababu o Yesus iwihimulia uahi de Ai honenge.) **40** O nyawa manga ngöe yoihene okia wotemo o Yesus, dé manga

hidogoronaka naga yotemo, "O nyawa nēnanga maraioka o Nabi gēnanga!" **41** Mahomoa yotemo, "Nēnanga o Koano Wohihohalamati!" Mā nagaō yotemo, "Se, yakunu o Koano Wohihohalamati wobōa o Galileaino?" **42** Ma Jou Ai Demo ma Buku magoronaka i tulihoka o Koano Wohihohalamati ganga o Daud aidifauku, dé aha wobōa o Betlehemino, enagēnanga o Daud aikapongo de ailōa." **43** Mabobahaka o nyawa yomulāenge imatekeributu mangale o Yesus. **44** Naga yomau iwitagoko Unanga, mā moiua o nyawa iwisō. **45** Maōraha ma Jou ai Tau yogōa-gōana yāhuloko yoiki iwitagoko o Yesus yolioinoka, o imam-imam manga hāeke dé o Farisioka manyawa gēnanga yāleha onangika, "Yadodoa ngini niwi aoua Unanga nenangino?" **46** Yogogōa-gōana gēnanga yohaluhu, "Uwee, koiwahi naga o nyawa yotemo-temo hokā Unanga!" **47** "Bote nginiō winihirehenoka Unanga?" o Farisioka manyawa yotemo gēnanga. **48** "Naga inakokuaha ngone o Farisioka manyawa iwingaku Unangika?" **49** Mā o nyawa manga ngōe nēnanga, önanga yanākoua o Musa aitita, dé sarakia dika önanga yahilolaioka." **50** Womatēngo manga hidogoronaka o Farisioka manyawa gēnanga ganga o Nikodemus, naga mahira woikoka o Yesusika. O Nikodemus watemo o Farisi manyawa mahomoaika, **51** "Imoteke o Tita, o nyawa womatēngo yakunua iwihukumu nako yoihenuahi aiparakara dé aimanarama yatailakouahi." **52** Yohaluhu önanga, "Ngonaō o Galileaino?" "Natailako dika Ma Jou Ai Demo ma Buku! Ngona aha namāke koiwa naga o nabi ai ahali o Galileaino!" **53** Ibōto de gēnanga, o nyawa mata-mata yolioka manga tauika.

8:1 Mā o Yesus woiki o Zaitun ma Doporonoka. **2** Yarehino mawange o ngoru-ngorumino Unanga woikoli ma Jou ai Tauika, dé o nyawa manga ngōe yobōa Unangika. O Yesus wogogeruku, daha womulāenge wadotoko önanga. **3** O raha gēnanga, o agamaka yodo doto-dotoko dé o Farisioka manyawa imiao Unangika o ngoheka momatēngo imihidatagoko mohowono. Onanga imihuloko momaokoile manga hidogoronaka, **4** daha yotemo o Yesusika, "Bapa Guru, o ngoheka nēnanga imihidatagoko maōraha magogiriaka mohowono. **5** O Musa ai Tita magoronaka naga

madatoro, nako o ngoheka hokonēnanga kiani imikaweli de o helewo hiadono mohonenge. Orahamēnanga sarakia anidamāke Bapa?" **6** Onanga yoleha hokogēnanga yomau iwitaili Unanga, hupaya ōnanga yakunu iwihihowono. Mā o Yesus womarukuku dika, dé watuli-tulihi de aihagarara o tonakuku. **7** Maōraha hokogenangika iwiributu, Unanga wagoraka Ai hāeke dé watemo onangika, "O nyawa nagona koiwa manga baradoha niahidogoronaka, ika, ōnanga madodihiraka imikaweli de o helewo o ngohekaika gēnanga." **8** I böto de gēnanga o Yesus womarukuokali dé watuliholi o tonakuku. **9** Kade yoihene iböto o Yesus wotemo hokogēnanga, yoiki ōnanga yamala o ngi gēnanga, imatēngo-tēngo mulāenge yobalu-baluhoka de yakauku. Mabaha o Yesus wogogogere womatēngokahi genangoka de o ngohekaokahi momaokoino ami ngioka. **10** Daha o Yesus wagoraka Ai hāeke dé wotemo o ngohekaika gēnanga, "Kiaka ōnanga mata-mata? Moiua inihukumu ngona?" **11** "Kowali, Bapa," mohaluhu. "Yaoa," o Yesus wato, "Ngohiō tonihukumua ngona. Orahamēnanga noiki, uha nobaradohali." **12** O Yesus wotemoli o nyawa yowōe-wōeika, wato, "Ngohi o dunia madararano. O nyawa ihiniki Ngohi aha yotagiua o huhutu magoronaka, mā yamāke o dararano mangango." **13** "Orahamēnanga ngona mahirete nohidōaka o hakihi mangale Ani diri mahirete," o Farisioka manyawa yotemo gēnanga Unangika, "Ani hakihi itiaiua." **14** O Yesus wohaluhu, "Ngaro Ngohi tohidōaka o hakihi mangale Ahi diri mahirete, Ngohi ahihakihi gēnanga itiai; hababu Ngohi tohiōriki kiaino Ngohi tobōa dé okiaika Ngohi toiki. Ngini nihiorikua kiaino Ngohi tobōa dé kiaika Ngohi toiki. **15** Ngini niahihakimi o nyawa de madatoro o nyawa; Ngohi tahihakimua o nyawa moiō ma. **16** Mā nako Ngohi tahihakimi o nyawa, Ngohi ahiputuhu gēnanga iadili, hababu Ngohi katoma tēngoua; Ahi Ama wohi hulo-huloko Ngohi naga dede Ngohi. **17** O Musa ai Tita mahidogoronaka itulihi hoko nēnanga: O hakihi madi ai nako o hakihi naga o nyawa yahinoto. **18** O hakihi ihidōaka mangale Ngohi ahidiri naga hinoto -- Ngohi dé Ahi Ama wohihulo-huloko Ngohi." **19** Onanga yato, "Ani Ama gēnanga kiaka?" O Yesus wohaluhu, "Ngini nihinākoua Ngohi kayaoa Ahi Ama. O demo hohiade ngini nihināko Ngohi, marai ngini niwināko Tongohi ahi Ama ö."

20 Mata-mata gënanga o Yesus wotemo maöraha Unanga wadotoko ma Jou ai Tauoka o hadaka mangi madatekoka. Mä o nyawa moiuaö iwi tagoko Unanga, hababu maöraha yadonuahi. **21** O Yesus watemoli onangika, "Ngohi aha toiki, dé ngini aha nihilingiri Ngohi, mä ngini aha nihonenge niabaradoha magoronaka. O ngi kiaka Ngohi toiki, ngini niyakunua niädono." **22** O Yahudioka manyawa yokokuaha yato, "Mudukua Unanga womau womahohonenge, hababu Unanga wotemo, 'O ngi toiki, ngini niyakunua niädono.'" **23** Daha o Yesus watemo onangika, "Ngini niböa dau de niaile; mä Ngohi toböa daku de tauku. Ngini o duniaino; Ngohi o duniainoua. **24** Mangale gënanga totemo nginika, ngini aha nihonenge niabaradoha magoronaka. Dé igoungu ngini aha nihonenge niabaradoha magoronaka, nako ningakua 'Ngohi nënanga iböto i hi hetongo NGOHI NAGA.'" **25** Onanga yoleha, "Imoteke madi ai Ngoni o nagona?" O Yesus wohaluhu, "Kaokiahi hotemo dede ngini! **26** Duru mangöeohi o hali mangale ngini nimau Ngohi tohi ade-ade dé tohihakimi. Mä Unanga wohihulo-huloko Ngohi, yakunu iwingaku. Dé Ngohi tohingahu o duniaika okia Ngohi toihene Unangino." **27** Onanga imangaratiua okia Unanga wotemo-temo onangika mangale o Ama. **28** Hababu gënanga o Yesus watemo onangika, "Damä nako ngini niwituboileoka o Nyawa manga Ngohaka, ngini aha nihiöriki 'Ngohi nenangala iböto ihihetongo NGOHI NAGA', dé ngini aha nihiöriki koiwa moiö Ngohi tadi ai Ahi diriino mahirete. Ngohi duga-duga Tohi demo okia wohidotokoka Ahi Ama Ngohino. **29** Dé Unanga wohihulo-huloko Ngohi naga dede Ngohi. Unanga komaiwahi wohi malaika Toma têngoka, hababu Ngohi hoko genangika tadi ai okia yadäene Ai hininga." **30** O Yesus wotemoka mata-mata gënanga iböto, manga ngöe o nyawa yongaku Unangika. **31** Ipahaika o Yesus watemo o Yahudioka manyawaika iwingaku-ngakuoka Unangika, "Nako ngini niwango niamoteke Tongohi ahi dodötoko, igou-goungu ngini nihinöniniki Ngohi, **32** ngini aha niwinako ma Jou Madutu wototiai de karana gënanga ngini aha inihilapahi." **33** Onanga yato, "Ngomi nënanga o Abraham aidifauku." "Komaiwahi ngomi midadi o gilaongo o nagonaika dika! Okia Ani dumutu honotemo, 'Ngini aha inilapahi?'" **34** O Yesus watemo onangika, "Igoungu

itiai Ahidemo nēnanga." "O nyawa yododiai o baradoha, ōnanga gēnanga o baradoha magilaongo. **35** Dé o gilaongo womatēngo koiwa aingī worīdi o tau magoronaka, ma o ngohaka kahiado-adonika aingī o tau magoronaka. **36** Hababu gēnanga, nako o ngohaka winihilapahioka ngini, ngini igou-goungu nilapahi. **37** Igoungu Ngohi tohiōriki ngini nēnanga o Abraham aidifauku. Mā ngini nimau nihitoma Ngohi, hababu ngini nioluku niatarima Tongohi ahi dodōtoko. **38** Okia Ngohi tamāke Ahi Amaka, gēnanga Ngohi tohingahu. Enahioko ngini niadiai okia nia ama winidotokoka nginika." **39** Onanga yohaluhu, "Tongomi mia ama o Abraham." O Yesus wato, "Ho nako ngini igou-goungu o Abraham aingohaka," "marai ngini niadiai okia o Abraham wadiai. **40** Ngohi tohiādono nginika o diai Ngohi toihene ma Jou Madutuino, mā ngini nimau nihitoma Ngohi. O Abraham wodiaiua hokogēnanga! **41** Ngini nidiai okia wadodiai nia ama mahirete." Onanga yohaluhu, "Ngomi o ngohaka maporetokaua. Mia Ama ngomi duga-duga womatēngo, enagēnanga ma Jou Madutu mahirete." **42** Daha o Yesus watemo onangika, "Ho nako ma Jou Madutu gēnanga nia Ama, ngini aha nihihininga Ngohi, hababu Ngohi tobōa ma Jou Madutuino. Ngohi tobōaua de Ahi hininga mahuka mahirete, mā Unanga wohihulo-huloko Ngohi. **43** Ma hababu okia ngini nimangaratiua okia Ngohi totemo? Hababu ngini niatānua ni ihene Tongohi Ahi dodōtoko. **44** O Ibilihi idadi niaama, dé ngini nimau niamoteke nia ama aimau. Kamahirahi o Ibilihi gēnanga wotoma-toma. Unanga komaiwahi wobōa o diaino, hababu unangoka o diai koiwa. Nako ünanga woeluku, gēnanga madiai, hababu hokogēnanga ibōto ünanga aibiaha. Unanga wototengeluku dé aiahali hagala o tengeluku. **45** Mā Ngohi tohidemo o diai, dé hababu gēnanga ngini nihingakua Ngohino. **46** O nagona niahidogoronaka ngini iyakunu nihimatoko de madiai naga o baradoha Ngohioka? Nako Ngohi tohidemo o diai, yadodoa ngini nihingakua Ngohino? **47** O nyawa manga ahali ma Jou Madutuino, yoihene ma Jou Madutu aidemo. Mā ngini ma Jou Madutuinoua, hababu gēnanga ngini nioluku ni ihene." **48** O Yahudioka manyawa iwibaluhu o Yesus, "Mode koigoungua ngomi mitemo, Ngonā o Samaria manyawa inipootekika o tokata?" **49** O Yesus wohaluhu, "Ngohi ihipootekua o

tokata. Ngohi tihoromati Tongohi ahi Ama, mā ngini nihihikauku Ngohi. **50** Ngohi tolingirua o horomati mangale Ahi diri mahirete. Naga womatēngo wohidailakoka o horomati mangale Ngohi, dé Unanga aha waputuhu o nagona itiai. **51** Igoungu itiai Ahi demo nēnanga, o nyawa yamoteke Tongohi ahidemo, aha yohonengua kahiado-adonika." **52** Daha o Yahudioka manyawa gēnanga yotemo o Yesusika, "O öraha nēnanga ngomi mihiöriki Ngona nēnanga igou-goungu inipootekika o tokata! O Abraham mahirete wohonengoka, hokogenangö o nabi-nabi mata-mata. Mā Ngona nato, 'O nyawa yamoteke Ahi demo tongohi aha yohonengua kahiado-adonika.' **53** Nako o Abraham mahirete wohonengoka, dé o nabi-nabi mata-mataö yohonengoka, Ngona nēnanga o nagona? Bote Ngonahi iholoi nolamoko de tongomi mia ama o Abraham!" **54** O Yesus wohaluhu, "Hokä nako Ngohi tolingiri o horomati mangale Ahi diri mahirete, o horomati gēnanga koiwa mamangarati. Wohihoromati Ngohi enagēnanga Tongohi ahi Ama ngini niato tingini nia Jou Madutu, **55** enahioko ngini niwinākoua Unanga. Mā Ngohi tinäko. Hokänako Ngohi totemo Ngohi tinākoua Unanga, Ngohi o nyawa moi toelu-eluku, imadäene hokä ngini. Ngohi tinäko Unanga, dé Tamoteke Ai demo. **56** Nia ama o Abraham womörene duru ünanga aha wamäke Tongohi ahi wange. Unanga wamäkeoka dé unanga womörene!" **57** Daha o Yahudioka manyawa yotemo o Yesusika, "Ani umuru o taongo moritoauahi, dé ngona nimäkeoka o Abraham?" **58** O Yesus wohaluhu, "Igoungu Ngohi tinitemo nginika: o Abraham womakilauahi, Ngohi nagaka." **59** Daha o Yahudioka manyawa gēnanga imalē o helewo la iwikaweli, o Yesus womangiunu Ai diri, daha woiki wamala ma Jou ai Tau.

9:1 Maöraha o Yesus wotagi Unanga wimäke o nyawa wopilo-piloko, kawomakilaunohi. **2** O Yesus iwinöniniki iwileha o Yesusika, "Bapa Guru, yadodoa o nyawa nēnanga iwihingohaka wopiloko? Bote karana ünanga mahirete wobaradoha ekola idadi karana ngoiayo de aiama yobaradoha?" **3** O Yesus wohaluhu, "Unanga wopiloko tounangua aibaradoha ekola aidimonua manga baradoha, mā hupaya o nyawa yakunu yamäke ma Jou Madutu aikuaha imanarama aidiri magoronaka. **4** Kao

wangeohi, ngone kiani homanarama Toünanga aimanarama wohihulo-
huloko Ngohi. O huhutu aha iböa, dé o nyawa moiua aha yakunu
yomanarama. **5** Hokokia madekana Ngohi o duniaka nēnanga, Ngohi o
dunia madararono." **6** Ipaha wotemo hokogēnanga, o Yesus waobiri o
tonakuku, dé wohiwaro o tonaka de Ai kibiri gēnanga. Ahao Unanga
wohinahu o nyawa gēnanga ailakoino, **7** daha wotemo unangika, "Noiki
namahau anibiono o Siloam ma Lupangika." (Siloam mamangarati
'Iwihuloko'.) O nyawa gēnanga woiki wamahau aibiono. Maöraha ünanga
wolio, ünanga womahi orikoka. **8** Ima kokadateke dé hagala o nyawa
iwimäke-mäkeoka ünanga wogaho-gahoko, mata-mata yotemo,
"Neünanga bote manyawa biaha wogogeruku wogaho-gahoko?" **9** Naga
yotemo, "Igoungu ünanga." Mä nagali yato, "Kowali, ünanga duga-duga
ngadeke imatero de o nyawa gēnanga." Mä o nyawa gēnanga mahirete
wotemo, "Ngohi nēnanga iböto." **10** Onanga iwileha unangika, "Sarakia
idadi hiädono ngona yakunu nomahi öriki?" **11** Unanga wohaluhu, "O
nyawa airomanga o Yesus gēnanga wadiai mahuhutulu o peseke, daha
wohinahu tongohi ahi lakoika, dé wato, 'Noiki nomamahau anibiono o
Siloam ma Lupangika.' Daha ngohi toiki. Dé maöraha ngohi tamahau
tongohi ahibiono, ngohi takunu tomahi öriki." **12** Onanga iwileha, "Kiaka
o nyawa gēnanga?" Unanga wohaluhu, "Tihiorikua." **13-14** Maöraha o
Yesus o tonaka wohiwaro de aikibiri mangale wadiai o nyawa wopilo-
piloko gēnanga yakunu womahiöriki, o wange gēnanga o Yahudioka
manga Puji mawange. Ma o nyawa wopopilo-piloko gēnanga iwiao o
Farisi manyawaika. **15** Onangö iwileha unangika gēnanga sarakia ünanga
wakunu womahiöriki. Unanga wohaluhu, "Unanga wogelenga o peseke
ngohi ahi lakoka, daha ngohitamahau dé ngohi yakunu tomahiöriki." **16**
Yamuruono naga o Farisioka manyawa manga hidogoronaka gēnanga
yotemo, "Kohamäkeua o nyawa wododiai nēnanga Ai ahali ma Jou
Madutuino, hababu Unanga wohi baragunaua o Yahudioka manga Puji
mawange." Mä o nyawa mahomoa yato, "Kiaka hamäke o nyawa
baradoha yodiai ihëra-hëranga hokä nēnanga?" Daha ipuda o ributu o
gamäke önanga manga hidogoronaka. **17** O Farisioka manyawa gēnanga
iwilehali o nyawaika gēnanga, "Okia anidamäke mangale Unanga wadiai

ngona nomahiöriki?" "Unanga o nabi," wohaluhu o nyawa gënanga. **18** Mä Yahudioka manyawa manga tutuda gënanga yoluku yongaku o nyawa gënanga kamahirahi wopiloko dé orahanënanga wakunu womahiöriki. Karana gënanga önanga ya ahoko aidimono, **19** dé yaleha, "Itiai nënanga niangohaka, ngini niato kawomahi adoninohi de wopiloko? Sarakia ünanga yakunu womahiöriki öraha nënanga?" **20** Ngoi ayo de ai ama o nyawa gënanga yohaluhu, "Igoungu nënanga tongomi miangohaka; dé unanga igoungu wopiloko kawomahi adoninohi. **21** Mä sarakia ünanga yakunu womahiöriki öraha nënanga, ngomi mihi orikua. Dé o nagona yadiai ünanga yakunu womahiöriki, genangö ngomi mihiorikua. Niwileha dika unangika, ünanga wobaluhoka; ünanga wakunu wohaluhu mahirete." **22** Ngoi ayo de ai ama o nyawa gënanga yotemo hokogënanga, hababu önanga yamodongo o Yahudioka manyawa manga tutudaika hababu önanga imaketemoka, o nyawa iwingaku o Yesus hokä ma Koano Wohihohalamat, yakunokaua yowohama o pupuji matauika. **23** Hababu gënanga ngoi ayo de ai ama o nyawa gënanga yotemo, "Unanga wobaluhoka; niwi leha dika unangika." **24** Daha önanga iwiahokoli o nyawa kangano wopilo-piloko gënanga, dé iwitemo unangika, "Nokoboto ngona aha notemo madiai. Ngomi mihiöriki o nyawa gënanga o baradoha manyawa." **25** O nyawa gënanga wohaluhu, "Unanga wobaradoha ekola kowali," "ngohi tohiörikua. Mä o hali moi ngohi tohiöriki; mahira ngohi topiloko, öraha nënanga ngohi tomahiöriki." **26** Daha önanga yotemoli unangika, "Unanga wodiai okia ngonai? Sarakia ünanga wadiai ngona nomahiöriki?" **27** O nyawa gënanga wohaluhu, "Tini ade-adeoka nginika, mä ngini nioluku ni ihene. Yadodoa ngini nimau nihigihenoli? Mudukua nginiö nimau nidadi iwinönikiki?" **28** Onanga iwidöana ünanga dé iwitemo, "Ngona ninönikiki; ngomi kowali! Ngomi o Musa miwiniki. **29** Ngomi mihiöriki ma Jou Madutu wotemoka o Musaika. Mä mangale o nyawa gënanga, ngomi mihiörikua kiaino Ai ahali." **30** O nyawa gënanga wohaluhu, "Ihëranga duru ngini nihiörikua okiaino Ai ahali, mä Unanga wadiaioka ngohi yakunu tomahiöriki. **31** Ngone hohiöriki ma Jou Madutu wahigihenua o nyawa baradoha, duga-duga o nyawa iwihohoromati ma Jou Madutu, dé yamoteke Ai mau. **32** Kadunia mamulaengohi

hogihenuahi naga o nyawa yodiai kaimahi adoninohi yopiloko yakunu imahiöriki. **33** Nako o nyawa gënanga ma Jou Madutuinoua, Unanga aha okia-kiaua wakunu wadiai." **34** Yohaluhu önanga, "Okia? Ngona ini omanga de o baradoha kanomahi adoninohi, ngona nomau nomidotoko ngomi?" De öraha gënanga ünanga iwiduhunoka wowohama o pupuji matauika. **35** O Yesus woihene önanga iwiduhunoka o nyawa gënanga o puji matauino. Unanga wilingiri o nyawa gënanga daha witemo unangika, "Naga ngona ningaku o Nyawa manga Ngohakika?" **36** O nyawa gënanga wohaluhu, "O nagona Unanga, Tuanga? Tanu nohiringahu hupaya ngohi tingaku Unangika." **37** "Ngona nimäkeoka Unanga," o Yesus wohaluhu. "Unanga öraha nënanga nima ade-ade de ngona." **38** "Ngohi tongaku, Jou," wotemo o nyawa gënanga, daha watilabukuku o Yesus aihimangoka. **39** O Yesus watemo, "Ngohi toböa o duniaka nënanga mangale todadi o hakimi; hupaya o nyawa yopilo-piloko yakunu imahiöriki, dé o nyawa imahiori-oriki, yodadi yopiloko." **40** Yamuruono naga o Farisioka manyawa naga genangoka yoihene o Yesus wotemo hokogënanga, daha önanga iwileha Unangika, "Ani dumutu ngomiö nënanga mipiloko?" **41** O Yesus wohaluhu, "Hokä nako ngini nipiloko, ngini nibaradohaua. Mä hababu ngini nitemo, 'Ngomi mimahiöriki,' gënanga mamangarati ngini kani baradohahi."

10:1 "Igoungu itiai Ahi demo nënanga: O nyawa yowohama o duba makurunga magoronaika yanïkua o ngorana, mä yodoa yanonu o ngëkomo mahomoa, o nyawa gënanga yotohi-tohiki dé yo ora-ora. **2** Mä o nyawa yowohama yanïki o ngorana, ünanga o duba magogöana. **3** O kurunga magogöana wibelenga o ngorana mangale ünanga, dé o duba-duba yanïki ai ilingi maöraha ünanga wa ahoko de maromanga ënanga moi-moi dé watuda ënanga wohihupu. **4** Wohihupu iböto o duba-duba gënanga, o gogöana gënanga womadagi mahimangoka, dé o duba-duba gënanga iwinïki ünanga hababu ënanga yanäko ai ilingi. **5** Enanga aha ioluku yänïki o nyawa mahomoa, ma aha iwidokaoara o nyawa gënanga, hababu yanäkoua ai ilingi." **6** O Yesus wohi ade-ade o hitotero nënanga, mä onanga imangaratiua okia Ai dungutu. **7** O Yesus wotemo wohigalioli,

"Igoungu itiai Ahi demo nēnanga: Ngohila o ngorana mangale o duba. **8** Mata-mata yoböa-böa ihira de Ngohi, geönanga yotohi-tohiki dé yo ora-ora, mä o duba-duba ihigihenua toönanga manga ilingi. **9** Ngohila o ngorana. O nagona yowohama ihinonu Ngohi, aha yohalamati; ünanga wohupu wowohama dé wamäke o inomo. **10** Yotohi-tohiki yoböa duga-duga mangale yotohiki, mangale yotoma dé mangale yakilianga. Mä Ngohi toböa hupaya o nyawa yamäke o ngango -- o ngango de maboloioka. **11** Ngohi o gogöana maoa. Gogöana maoa wohidöaka Ai wowango mangale Ai duba-duba. **12** O hewa manyawa o gogoanua gēnanga, dé o duba-dubaö gēnanga tounaua, aha woara wamalaika o duba-duba nako ünanga wamäke o kaho honganika iböa. Done o duba-duba gēnanga aha o kaho honganika yakaboto dé ihikokabarihika. **13** O hewa manyawa gēnanga woara, hababu ünanga womanarama mangale o hewa. Unanga wahaduliua o duba-duba gēnanga. **14-15** Ngohila o gogöana maoa. Hokä o Ama wohinäko Ngohi dé Ngohi tinäko o Ama, hokogenangoli Ngohi tanäko Ahi duba-duba dé enangö ihinäko Ngohi. Ngohi tomahilapahi Ahi wowango mangale önanga. **16** Nagahi o duba-duba mahomoaö ka Ngohi madutu, mä iwohamua o duba matika magoronaika nēnanga. Onangö kiani ta ao dé onanga aha ihigihene Ahi ilingi. Onanga mata-mata aha yodadi kao tikamoi de magogöana kamoi. **17** O Ama wohihininga Ngohi hababu Ngohi tomahilapahi Tongohi ahiwowango, mangale tatarimaokali. **18** O nyawa moiuaö yakunu yalē Ngohioka. Ngohi tohilapahi imoteke Ahi mau mahirete. Ngohi tokuaha tohilapahi, dé tokuaha talēoli. Gēnanga Tongohi ahi manarama, tatarima Ahi Amaino." **19** Karana o Yesus wotemo hokogēnanga, o Yahudioka manyawa muläenge imateke ributu. **20** Yowöe yotemo, "Unanga iwipootekika o tokata! Unanga iwitogohanga! Mangale okia ngini niwihi gihene ünanga?" **21** Mä nagaö yotemo, "O nyawa yapootekika o tokata, hokogenangua yotemo-temo! Yakunu o tokata yadiai o nyawa yopiloko yakunu imahiöriki?" **22** O Yerusalemoka magogiria o nyawa ihirame ma Jou ai Tau ma Tabisang ma Wange. Oraha gēnanga o dumamäta maöraha. **23** O Yesus woma dagi-dagi o Löa Salomo, ma Jou ai Tau magoronaka, **24** o öraha o Yahudi manyawa yoböa imatoomu iwihigilolitino o Yesus.

Onanga yotemo, "Hiädono hokokia Ngona nomau nomi malaika ngomi mibingu? Nomihi ngahu nohitotararonino, nako Ngona igou-goungu ma Koano Wohihohalamati." **25** O Yesus wohaluhu, "Ngohi totemoka nginika, mä ngini ningakua. O manarama-manarama Ngohi tadiai de Ahi Ama Ai romanga, ihidöaka manyonyata mangale Ngohi. **26** Ngini ningakua hababu ngini iwohamua Tongohi ahi duba-duba. **27** Ahi duba-duba yogihene Ahi ilingi. Ngohi tanako ënanga, dé enanga ihiniki Ngohi. **28** Ngohi tahidöaka önanga o ngango madutu dé ikakali, dé kahiado-adonika önanga aha yobinahaua. O nyawa moiuaö yakunu yaora önanga Tongohi ahi giamoka. **29** Ahi Ama, wohihidöaka önanga Ngohino, yatilakurile hagala mata-mata. Dé o nyawa moiuaö yakunu yäora önanga Ahi Ama aigiamoka. **30** Ngohi dé o Ama naga kamoï." **31** Daha o Yahudioka manyawa imalëoli o helewo yato iwi kaweli o Yesus. **32** Mä, o Yesus watemo onangika, "Ngini nia mäkeoka Ngohi tadiai o manarama ma oa-oa mangöe, wohihi döakoka o Ama Ngohino. O manaramino mata-mata gënanga, kiaka idadi hababu, ngini nimau nihikaweli Ngohi?" **33** O Yahudioka manyawa gënanga yohaluhu, "Igoungua karana Ani manarama-manarama maoa-oa gënanga ngomi mimau minikaweli Ngona de o helewo, mä hababu Ngona nihikauku ma Jou Madutu. Ngona o nyawa moi, nomau nomadiai Anidiri ma Jou Madutu." **34** Daha o Yesus wohaluhu, "Mode koigoungua nia Tita ma Buku magoronaka itulihi: ma Jou Madutu wotemo, 'Ngini naga o gikiri'? **35** Ngone hohiöriki okia itulihi Ma Jou Ai Demo ma Buku magoronaka idadi mangale kahiado-adonika. HÖ, nako ma Jou Madutu wahetongo 'o gikiri' hagala o nyawaika yatotarima Ai demo, **36** yadodoa ngini nitemo Ngohi tihikauku ma Jou Madutu hababu totemo Ngohi ma Jou Madutu Ai Ngohaka? Enahioko Ngohi wohiiriki o Ama dé wohihuloko o duniauku. **37** Nako Ngohi tadiaiua o manarama wohihidöakoka o Ama, uha nihingaku Ngohino. **38** Mä karana Ngohi tadiai ënanga, niangaku aha okia Ngohi tadiai gënanga, ngaro ngini nioluku nihingaku Ngohino. De hokogënanga ngini nihiöriki dé nimangarati o Ama tatapu kamoï de Ngohi, dé Ngohi i tatapu kamoï de o Ama." **39** Onanga ihidailakoli iwi tagoko o Yesus, mä Unanga wolapahi önanga manga giamoka. **40** O Yesus wolio o Yordan ma Ngairi

mahonongaika, o ngi o Yohanis mahira waohiki dé wogogere dokengoka. **41** Manga ngöe o nyawa yoböa Unangika. Onanga yato, "O Yohanis wodiaiua i hëra-hëranga, mä mata-mata wohi dodemoka mangale o nyawa nënanga itiai." **42** Daha o nyawa manga ngöe dokengoka yongaku o Yesusika.

11:1 Womatëngo o nyawa airomanga o Lazarus wogogere o Betania mabereraka de aibira-biranga o ngo Maria dé o ngo Marta. **2** O ngo Maria mangoheka nemünanga mohituagi de o minya mabounu mahëmo-hëmoroma Jou ailouku, dé mohiehe de ami tadauru. Oaha moiuku o Lazarus wopanyake. **3** Ngoi hiranga yahinoto ihiabari o Yesusika, "Jou, tongomi miairanga Jou nihohininga gënanga wopanyake." **4** Maöraha o Yesus woihene o abari gënanga, Unanga wotemo, "Panyake nënanga aha koidadiua o hababu wohonenge. Nënanga idadi hupaya ma Jou Madutu iwihimulia, dé hupaya hababu gënanga ma Jou Madutu ai Ngohakö iwihimulia." **5** O Yesus wahininga o ngo Marta, o ngo Maria dé o Lazarus. **6** Mä maöraha o Yesus wamäke o abari o Lazarus wopanyake, Unanga wohangaja womagogogere o wange hinotohi. **7** Ipaha de gënanga aha Unanga watemo iwinönikika, "Niaino ngone homa idulu o Yudeaika." **8** Onanga yohaluhu, "Bapa Guru, aha ipahaino o Yahudi manyawa yomau inikaweli Bapa de o helewo, dé öraha nënanga Bapa nomau homaiduloli dokengika?" **9** O Yesus wato, "Mode koigoungua o wangeoka madekana o jam ngimoi de hinoto?" "O nyawa imadagi o wangeoka, yopelekua hababu önanga yamäke o dunia madararano nënanga. **10** Mä o nyawa yotagi maöraha o hutu-hutu aha yopeleke, hababu koiwa o dararano onangoka." **11** Hoko gënanga o Yesus wotemo. Ipaha Unanga wotemoli, "Tongone nanga dodiawo o Lazarus womaiduoka, mä Ngohi aha toiki titomanga ünanga." **12** Iwinönikiki o Yesus yotemo, "Jou, nako o Lazarus womaiduoka, done ünanga aha wotogumu." **13** O Yesus aidungutu, enagënanga o Lazarus wohonengoka. Mä onanga yatobote o Yesus wotemo gënanga naga o Lazarus womaidu biaha. **14** Karana gënanga o Yesus wotemo onangika wohitotararonika, "O Lazarus wohonengoka. **15** Mä Ngohi kato sanangi dika, Ngohi

koihiwa naga dokengoka, hababu iholoi yaoa mangale ngini, hupaya yakunu ningaku. Niaino ngone hoiki öraha nënanga o Lazarusika." **16** O Tomas, iwiaho-ahoko "O Hago" watemo aidodiawoika iwinöniniki o Yesus, "Niaino ngone hiniki, malaika la ngoneö hohonenge dede Unanga!" **17** Maöraha o Yesus womahiädono o ngi gënanga, o Lazarus o wange iata iböto madekana o lungunoka. **18** Betania yadatekuku o Yerusalem done ho kilo hange magurutika imatingaka. **19** Manga ngöe o Yahudioka manyawa yoböainoka yalega o ngo Marta dé o ngo Maria mangale yalaru önanga hababu wohonenge manga iranga. **20** Maöraha o ngo Marta moihene o Yesus woböa, münanga mohupu mibuhuku o Yesus, ma o ngo Maria mogogogere o tauoka. **21** O ngo Marta motemo o Yesusika, "Jou, hokänako Jou naga nenangoka öraha gënanga marai tongohi ahiranga wohonengua. **22** Ngaro hoko gënanga ngohi tohiöriki öraha nënanga dika ma Jou Madutu aha wohidöaka okia dika Jou nogahoko Unangika." **23** O Yesus wotemo o ngo Martaika, "Ani iranga aha wowangoli." **24** O ngo Marta mohaluhu, "Ngohi tohiöriki o Lazarus aha wowangoli nako o nyawa yohone-honengoka yomomiki o Kiamati ma Wangeoka." **25** O Yesus womi temo o ngo Martaika, "Ngohi tahidöaka o wowango dé Ngohi tahi momiki o nyawa yohone-honengoka." "O nyawa ihingaku Ngohino aha yowango, ngaro Unanga wohonengoka. **26** Dé o nyawa yowango-wango ihingaku Ngohino, kahi ado-adonika aha yohonengua. Nongaku ngona o hali gënanga?" **27** "Jou," o ngo Marta mohaluhu, "Ngohi tongaku Jou ma Jou Madutu ai Ngohaka, ma Koano Wohihohalamati aha woböa o duniaino." **28** O ngo Marta motemo ipaha hokogënanga, münanga moiki momiahoko o ngo Maria dé momihudu munangika, "Ma Bapa Guru naga nenangoka; Unanga wonileha ngona." **29** Moihene gënanga, o ngo Maria moma tai-taiti momomiki, daha moiki ima mäke de o Yesus. **30** Oraha gënanga, o Yesus wowohamuahi o kapongika. Unanga ka o ngo Marta ami ngi okahi kiaka imamäke de Unanga. **31** O Yahudioka manyawa imilolaru-laru o ngo Maria amitauoka, imimäke o ngo Maria momomiki de moma tai-taiti mohupu; hÒ onanga yoiki iminiki münanga, hababu önanga yatobote münanga moiki o lungunika la moari. **32** Maöraha o ngo Maria momahiädono o Yesus

aingiika dé mimäke Unanga, o ngo Maria matilabukuku Ai himangoka dé motemo, "Jou, hokä nako Jou naga nenangoka öraha gënanga, marai ahi iranga wohonengua." **33** Maöraha o Yesus womimäke o ngo Maria moari, dé o Yahudioka manyawa yoböa-böaino imakiniki de o ngo Maria gënanga onangö yoari, Ai hininga ihuha, dé Unanga iwimäke duruhe iwitora. **34** De Unanga waleha onangika, "Kiaka ngini niwilungunu ünanga?" Onanga yohaluhu, "Naino nolega, Jou." **35** Daha o Yesus woari. **36** O Yahudioka manyawa gënanga yotemo, "Niwimäke, kaogoguleua Ai dora o Lazarusika!" **37** Mä naga manga hidogoronaka önanga yotemo, "Unanga wadiai o nyawa yopilokoka imahiöriki, yadodoa Unanga wakunua watatoko hupaya o Lazarus uha wohonenge?" **38** O Yesus duruhe iwitorali, daha woiki o lungunika. O lungunu gënanga naga o aruku moi ihitamunu de o helewo kohapako. **39** O Yesus wato, "Nihirehene o helewo gënanga." O ngo Marta, ngoi hiranga o nyawa wohone-honenge gënanga, mohaluhu, "Mä, Jou ünanga o wange iata iböto o lungunoka. Marai aibounu imelaka!" **40** O Yesus wotemo o ngo Martaika, "Ngohi totemoka ngonaika: Nako ngona nongaku, ngona aha namäke hokokia ma amoko ma Jou Madutu aikuaha!" **41** De onangö ihirehene o helewo gënanga. Dahao o Yesus womamataga o dihangile dé wotemo, "Tarima kasi, Bapa, hababu Ngona nohigihenoka Ngohi. **42** Ngohi tohi öriki Ngona hoko genangika nohi gihene Ngohi, mä Ngohi totemo nënanga, mangale o kawaha naga nenangoka; hupaya önanga yongaku Ngonala nohi huloko Ngohi." **43** Iböto wotemo hokogënanga, o Yesus wotemo de Ai ilingi ilamoko, "Lazarus, nohupu!" **44** Daha o Lazarus wohone-honengoka gënanga wohupu. Mä aigiana dé ailou kade mahahawookahi de o ngöere magare-garehe mahohailoa dé aibiono kai tamunukohi de o ngöere o biono madadamunu. "Niahohe o ngöere magare-garehe gënanga hupaya ünanga womadagi woworo-woro," o Yesus watemo o kawahaika gënanga. **45** O Yahudioka manyawa manga ngöe yoböa-böaino imilega o ngo Maria, iwingaku o Yesusika maöraha önanga yamäke idodadadi gënanga. **46** Mä yamuruono naga manga hidogoronaka önanga, yoiki o Farisioka manyawaika dé yoade-ade okia wadiaioka o Yesus. **47** Hababu gënanga o Farisioka manyawa dé o imam-imam manga häeke yadiai o

doomu de o Agama ma Juru Hakimi. Onanga yato, "Ngone kiani hodiai okia? O nyawa nēnanga wodiai mangöe ihëra-hëranga! **48** Nako ngone himala Unanga hoko nēnanga o nyawa mata-mata aha iwingaku Unangika. Dé mabaha yokokuaha o Romaka aha yoböa yawedere ma Jou ai Tau dé mata-mata tongone nanga hoana." **49** Womatēngo onangino airomanga o Kayafas, imam womomulia taongo gēnanga, wotemo, "Ngini okia-kiaua nihiöriki. **50** Yadodoa ho ngini niodibangua mangale o kawaha iholoi yaoa o nyawa womatēngo wohonenge, la uha o hoana mata-mata yobinaha?" **51** Imoteke madaia o Kayafas wotemo gēnanga, aidibanga mahirete okaua de yaino. Mä hokä o imam womomulia o taongo gēnanga ünanga wohidodemoka mangale o Yesus aha wohonenge mangale o Yahudioka manyawa. **52** Dé ka o Yahudi manyawaua dika, mä genangö mangale yatoomu dé yahirimoi ma Jou Madutu Ai ngoha-ngohaka imahi koka barihika. **53** Muläenge o wange gēnanga o Yahudioka manyawa yokokuaha imakaturu mangale iwitoma o Yesus. **54** Hababu gēnanga o Yesus waikaokaua o nyawa yowöe-wöe manga himangika o Yahudi manyawa manga hidogoronaka. Unanga wamala o Yudea, daha woiki o bereraika maromanga Efraim itigi de o tonaka makokakaha. Genangoka Unanga wogogere de iwinöniniki. **55** Oraha gēnanga o Yahudioka manga Wange ma Amoko o Paskah itigioka. Manga ngöe o nyawa o kapo-kapongino yoikoka o Yerusalemika mangale yadaia madatoro ihitebini manga diri, koi dadiuahi o rame-rame gēnanga. **56** Onanga iwilingiri o Yesus, dé maöraha imatoomu ma Jou ai Tauoka, önanga imaketemo moi de moika, "Sarakia niadamäke? Ngaroma Unanga wainoua o rame-rameino nēnanga." **57** Onanga yotemo gēnanga hababu o imam-imam manga häeke dé o Farisioka manyawa ihihupuoka o pareta, nako o nyawa ihiöriki okiaka o Yesus naga, kiani ihingahu, hupaya o Yesus yakunu iwitagoko.

12:1 O wange butangahi de o Paskah ma Wange ma Amoko yadono, o Yesus woiki o Betaniaika. O ngi gēnanga aigogere o Lazarus, ünanga wohonengoka de o Yesus wihimomikoka. **2** Dokengoka Unanga iwihiolomo önanga, dé mäleleani o ngo Marta. O Lazarus dé iwiado-

adonino yogogere yolomo imakiniki de o Yesus. **3** Ahao o ngo Maria maino mǎo done holitere ngade yatogorona, o minya mabou-bounu narwastu maija duru kohahali. Mǎnanga mihituagi o minya gǎnanga o Yesus ailouku, daha maehe de amitadauru. O tau magoronaka gǎnanga idadi mabounu ihǐmoro hababu o minya mabou-bounu gǎnanga. **4** Mǎ o Yudas Iskariot, o nyawa womatǐngo o Yesus iwinǐniniki -- mabahaino wihukunu o Yesus -- wato, **5** "Yadodoa o minya mabou-bounu gǎnanga nahukunua dika de maija o tiwi haǎka o ratuhu hange, dǐ ma tiwi nahidǐaka o nyawa yomomihikinika?" **6** O Yudas wotemo hoko gǎnanga koigoungua hababu wahininga o mihikini manyawa, mǎ hababu ũnanga wotohi-tohiki. Unanga mamoi-mamoi walǐ manga doomu matiwi mabukuoka i gogogono unangoka. **7** Mǎ o Yesus wotemo, "Nimi malaika o ngoheka gǎnanga! Mǎnanga modiai nǐnanga mangale mawange ihilungunu Ngohi. **8** O nyawa yomomihikini hokogenangika naga niahidogoronaka ngini, mǎ Ngohi kowali." **9** O Yahudioka manyawa manga ngǐe yoihene o Yesus naga o Betaniaka, hǐ onanga yoiki dokengika. Onanga yoiki koigoungua mangale hababu o Yesus dika, mǎ hababu onangǐ yomau iwilega o Lazarus wihimomikoka o honengino. **10** Hababu gǎnanga o imam-imam manga hǎeke yomau iwitoma o Lazarusohi; **11** hababu ũnanga idadi o hababu, o Yahudioka manyawa kamanga ngǐe yǎmalaka ōnanga dǐ iwingaku o Yesusika. **12** Yarehino mawange o nyawa manga ngǐe yobǐaka mangale ihirame o Paskah yoihene o Yesus o ngǐkomo mahidogoronainoka wameta o Yerusalem. **13** Onanga yalǐ o biso mahoka-hoka daha yoiki iwibuhuku Unanga, de yopǐa-pǐaka, "Niwi puji ma Jou Madutu! Iwihibarakatioka Unanga wobobǐa-bǐa de ma Jou Ai romanga. Iwihibarakatioka o Israeloka manga Koano!" **14** O Yesus wamǎke o keledai mago moi, dǐ Unanga wobarenuke. La idadi itulihoka Ma Jou Ai Demo ma Buku magoronaka: **15** "Uha nohawana, Sion mamomoholehe! Ni lega ani Koano wobǐa, wobarene o keledai mago moi!" **16** Oraha gǎnanga o Yesus iwinǐniniki imangaratiuahi mata-mata gǎnanga. Mǎ ipahaika o Yesus iwihimuliaka de Toũnanga aihonenge, daha ōnanga imahininga, hagala o nyawa yodiaioka Unangika itulihoka Ma Jou Ai Demo ma Buku magoronaka iwikorona

Unanga. **17** Hagala o nyawa yohima-himangino maōraha o Yesus wiahoko o Lazarus wohupu o lungunino wohonengoka dé wihimomiki, gila-gila ihidōaka o hakihi mangale o hali gēnanga. **18** Hababu gēnanga o nyawa manga ngōe gēnanga yoiki o Yesusika hababu ōnanga yoihene Unanga wodiaioka ihēra-hēranga gēnanga. **19** O Farisioka manyawa imaketemo moi de moika, "Kia-kiaua ngone hakunu hodiai! Nia māke dika, o dunia ingodumu yoiki iwiniki Unanga!" **20** Manga hidogoronaka hagala o nyawa yoi-oiki o Yerusalemika mangale yohubayanga maōraha o rameanga gēnanga, nagaō yamuruono naga o Yunanioka manyawa. **21** Onanga yoiki o Filipusika dé yato, "Riadodoto, nako yakunu, ngomi mioigo mimaka māke de o Yesus." (O Filipus ai ahali o Betsaidaino o Galilea matonakoka.) **22** O Filipus woiki wohingahu o hali gēnanga o Andreasika, dé ipaha ōnanga yahinoto ihiādono o Yesusika. **23** O Yesus watemo onangika, "Maōraha ibōto o Nyawa manga Ngohaka iwihimulia. **24** Igoungu itiai Ahi demo nēnanga: Nako o gandum o mui moi idatomua o tonakuku dé ihonenge, ēnanga aha i gogogere kao mui moi dika. Mā nako o gandum mamui gēnanga ihonenge, ahaō ēnanga ihihohoko o gandum koha amoko. **25** O nyawa yohininga manga wowango aha ihihanga manga wowango. Mā o nyawa yodohata manga wowango o duniaka nēnanga, aha yapaliara mangale manga wowango madutu dé ikakali. **26** O nyawa yomau ihileleani Ngohi kiani ihi niki Ngohi; hupaya ihilōleleani Ngohi yakunu dede Ngohi kiaka Ngohi naga. O nyawa ihilōleleani Ngohi aha Ahi Ama wahoromati." **27** "Ahi hininga Ngohi baliha; okia kiani Ngohi totemo ōrahanēnanga? Kiani Ngohi totemo, 'Bapa, nohihalamatati Ngohi ōrahanēnanga'? Mā hababu gēnanga Ngohi tobōa mangale tatagongo o hangihara ōrahanēnanga. **28** Bapa, tohimulia Aniromanga!" Toihene o ilingi o dihanguku itemo, "Ngohi tonihimuliaka, dé Ngohi aha tonihimuliali." **29** O nyawa manga ngōe naga genangoka yoihene o ilingi gēnanga. Onanga yato, "Gēnanga o dotoreke!" Mā nagaō yato, "Kowali! O malaekat iwitemo Unangika!" **30** Daha o Yesus wotemo onangika, "O ilingi gēnanga ni ihene, igoungua mangale Ngohi ahihali, mā mangale tingini niahali. **31** Orahanēnanga maōraha ibōto o dunia yahukumu; ōrahanēnanga o dunia makuaha nēnanga yaluluoka. **32** Mā

Ngohi nēnanga, nako Ngohi ihituboileoka o dunia malokuoka, Ngohi aha tatauru mata-mata o nyawa Ngohino." **33** Unanga wotemo hokogēnanga, mangale wohidumutu sarakia madodagi Unanga aha wohonenge. **34** O nyawa yowōe-wōe gēnanga yotemo Unangika, "Imoteke tongomi mia Tita ma Buku, ma Koano Wohihohalamati aha wowango kahiado-adonika. Sarakia Ngona yakunu notemo o Nyawa manga Ngohaka kiani iwituboile, o dunia malokuoka? O nagona o Nyawa manga Ngohaka gēnanga?" **35** O Yesus wohaluhu, "Duga-duga kabotinokahi dika o dararono gēnanga naga ngini niahidogoronaka. HÒ, nitagi hokokia madekana o dararono gēnanga kanagahi, hupaya ngini uha inibānga o huhutu. O nyawa imadagi o huhutu magoronaka, wohiorikua kiaika ünanga wakaika. **36** Niangaku o dararonika gēnanga, hokokia madekana o dararono gēnanga kanagahi nginioka, hupaya ngini nidadi o dararono mangoha-ngohaka." O Yesus wotemo ibōto hokogēnanga, Unanga genangoka de woiki dé wolukoka womahi matoko Ai diri onangika. **37** Ngaro mangōeoka ihēra-hēranga wodiai o Yesus önanga manga himangoka, önanga iwingakua Unangika. **38** Idadi okia ma Nabi Yesaya wotemoka, "Jou, o nagona yāngaku tongomi mia abarika? O nagonaika anikuaha Jou nohimatoko?" **39** Hababu gēnanga önanga yakunua yongaku, hababu o Yesaya wotemokali, "Ma Jou Madutu wotemo, **40** 'Ngohi tapilokoka önanga manga lako, tadiai önanga manga hininga itogowini; hupaya manga lako uha imahi öriki, de manga dibanga önanga uha imangarati. Hupaya önanga uha yolio Ngohino, la Ngohi tahitogumu önanga.' " **41** O Yesaya wotemo hokogēnanga, hababu ünanga wamākeoka Ai mulia de Ai kuaha o Yesus, dé wohidemo yakorona Unangika. **42** Ngaro hokogēnanga, o nyawa manga ngōe, o Yahudioka manyawa yokokuaha manga hidogoronaka mahirete iwingaku o Yesusika. Mä onanga yobaraniua iwingaku gēnanga ihitotararonika, hababu önanga yohawana uha-uha o Farisioka manyawa yahigumalaokaua önanga yowohama o pupuji matauika. **43** Onanga iholoi yoigo yamāke o hikiriri o nyawaino, ngaro de o hikiriri ma Jou Madutuino. **44** Dahao o Yesus womapōaka, "O nyawa ihingaku Ngohino, koigoungua Ngohino ünanga wohingaku, mä Unangika wohihulo-huloko Ngohi. **45** Dé o nyawa ihmāke Ngohi, iwimāke Unanga wohihulo-huloko Ngohi. **46** Ngohi tobōa

o duniaka nēnanga hokā o dararono, hupaya mata-mata o nyawa ihingaku-ngaku Ngohino uha yogogere o huhutu magoronaka. **47** O nyawa yoihene Tongohi ahi dodōtoko, mā yamotekua ēnanga -- Ngohiua tihukumū ünanga. Hababu Ngohi tobōa tahakimua o dunia nēnanga, mā mangale tohihalamatī ēnanga. **48** O nyawa ihitila Ngohi dé yoluku yoihene Ahi demo, naga yahihaki-hakimi. O demo Ngohi tohi ado-adono gēnanga, aha yahihakimi o Kiamati ma Wangeoka. **49** Hababu Ngohi totemoua, Ahi mauino mahirete; o Ama wohi huloko Ngohi, Unanga wohihipareta Ngohino okia kiani Tohi demo dé Tohiādono. **50** Dé Ngohi tohiōriki Ai pareta gēnanga ihidōaka o ngango madutu dé i kakali. Ho Ngohi tohiādono hokā wohi dotokoka o Ama Ngohino."

13:1 O wange moiohi Paskah ma Wange ma Amoko, o Yesus wohiōriki maōraha yadonoka Unanga wamala o dunia nēnanga de wolio Ai Amaika. Unanga wahininga hagala o nyawa yodadi Toünanga madutu o duniaka, dé Unanga tatapu wahininga ōnanga hiādono mabahaika. **2** O Yesus dé iwinōniniki magogiria yolomo o hutu-hutu mangolomo. O Ibilihi ihingohamikaka madibanga itotorou aihininga magoronaka o Yudas o Simon Iskariot aingohaka, mangale wihibodito o Yesus. **3** O Yesus wohiōriki o Ama wihilapahioka mata-mata o kuaha Unangika. Unanga wohiorikō, Unanga wobōa ma Jou Madutuino dé aha wolio ma Jou Madutuika. **4** Hababu gēnanga Unanga womaoko, Ai juba waiki, dé wohiliko o handoko Ai goronaino. **5** Ibōto gēnanga Unanga woguhe o akere o bokolo moi magoronauku, dahao womulāenge waihorō manga lou iwinōniniki dé wohitoraha de o handoko wohiliko-likoino Ai goronaino. **6** Unanga womahiādono o Simon Petrusika, de wotemo, "Jou, yakunu Jou tongohi ahi lou de naihorō?" **7** O Yesus wohaluhu, "Oraha nēnanga nomangaratiua okia Ngohi tadiai nēnanga, mā ahaō ngona nomangarati." **8** "Uha, Jou," wotemo o Petrus o Yesusika, "Hakali-kali uha Jou, naihorō tongohi ahilou!" Mā o Yesus wohaluhu, "Nako Ngohi toni ihorua, ngona koiwa ani dodohanga dede Ngohi." **9** O Simon Petrus wato, "Nako hokogēnanga, Jou, uha duga-duga katongohi ahilou mā tongohi ahigiana dé ahihaekō!" **10** "O nyawa imaohikoka, yotebinoka mata-mata," o Yesus

witemo o Petrusika. "Unanga ngaro uha womatebinoli; sawaliua ailou. Ngini nēnanga nitebinoka, mā mata-mataua." (**11** O Yesus wohiorikoka o nagona aha iwihibodito. Gēnanga mangale Unanga wotemo, "Ngini nēnanga nitebinoka, mā mata-mataua.") **12** O Yesus wāihoro ōnanga manga lou ibōto, Unanga womahi noakali Ai juba dé wogogerokali. Daha Unanga watemo onangika, "Nimangarati ngini okia aha ipahaino Ngohi todiaioka nginika? **13** Ngini nihiahoko Ngohi o Guru dé o Jou. Dé igoungu hokogēnanga. **14** Nako Ngohi hokā nia Jou dé nia Guru taihoro nialou, nginiō kiani nimakihoro nialou. **15** Ngohi tohidōaka o dulada nēnanga nginika, hupaya nginiō niadai okia Ngohi tadiaioka nginika. **16** Igoungu itiai Ahi demo nēnanga: womatēngo o gilaongo iholoiua wolamoko de aituanga, dé womatēngo o huhuloko iholoiua de iwihohulo-huloko. **17** Nako ngini nihiōrikoka mata-mata nēnanga, niutumumu ngini nako niadai. **18** Okia totemo nēnanga, igoungua inidāene ngini mata-mata. Ngohi tohiōriki o nagona honanga Ngohi tairikoka. Mā okia itulihoko Ma Jou Ai Demo ma Buku magoronaka, kiani idadi, enagēnanga 'O nyawa yolomo dede Ngohi, aha ihilawani Ngohi.' **19** O hali gēnanga tohiadonoka nginika ōrahanēnanga, koidadiuahi ma, hupaya nako o hali gēnanga damā imadadi, ngini aha ningaku Ngohila Unanga ihihetongo, NGOHI NAGA. **20** Igoungu itiai Ahi demo nēnanga: O nagona yatarima o nyawa Ngohi tahulo-huloko, ōnanga ihitarima Ngohi. Dé o nagona ihitarima Ngohi, iwitarima Unanga wohihulo-huloko Ngohi." **21** O Yesus wotemo ibōto hokogēnanga, Unanga duru iwitora. Daha Unanga wotemo, "Igoungu itiai Ahi demo nēnanga: O nyawa womatēngo niahidogoronaka ngini aha wohihibodito Ngohi." **22** Iwinōniniki kaimakupulono moi de moi de duru yohēranga, karana ihiorikua Ai dungutu o nagonaika. **23** Winōniniki wihohininga o Yesus yogogere imadatekuku de o Yesus. **24** O Simon Petrus wikulabete unangika, hupaya ünanga woleha o Yesusika o nagonaika madungutu. **25** Winōniniki gēnanga womahitigi o Yesusika, dé woleha, "O nagona ünanga, Jou?" **26** O Yesus wohaluhu, "O nyawa Ngohi tihidōaka o roti, Ngohi tatonoka o udo-udomo magoronauku, geünanga manyawa." O Yesus walē o roti o luiti moi, watono o udo-udomo magoronauku; daha wihidōaka o Yudasika o Simon Iskariot

aingohaka. **27** De madataitoka o Yudas wodahongo o roti gënanga iböto, o Ibilihi iwohama aihininga magoronaika. Daha o Yesus witemo unangika, "Nadiai itaiti okia nomau nadiai." **28** O nyawa moiuaö onangino yogogeruku yolomo genangoka imangarati yadodoa o Yesus witemo hokogënanga o Yudasika. **29** Utunaga yatobote o Yesus wihuloko o Yudas woija okianaga iparalu mangale o rame gënanga, ekola wahidöaka o tiwi mahuhutulu o huha manyawaika -- hababu o Yudas naga wasö to önanga manga tiwi mabuku. **30** O Yudas wodahongo iböto o roti gënanga, ünanga gila-gila wohupu. O wange yohutuoka. **31** O Yudas woikoka, o Yesus watemo, "Orahanënanga o Nyawa manga Ngohaka iwihimulia, dé ma Jou Madutu iwihimulia mangale Unanga. **32** Nako ma Jou Madutu iwihimulia mangale Unanga, Unangö aha iwihimulia ma Jou Madutu mangale Ai diri mahirete. Iholoi idogo ma Jou Madutu aha wi himulia de madataitoka. **33** Ahi ngoha-ngohaka, Ngohi aha totedekanokaua Togogerohi dede ngini. Ngini aha nihilingiri Ngohi, mä hokä Ngohi totemoka o Yahudioka yakokuahaika, hoko genangoli Ngohi totemo nginika; o ngi Ngohi to oi-oikika, ngini niakunua niädono. **34** O pareta mahungi Ngohi tinihidöaka nginika: Nima tekehininga moi de moi. Hokä Ngohi tini hininga ngini, hokä genangö, ngini kiani nimatekehininga. **35** Nako ngini nima teke hininga o nyawa mata-mata aha ininäko ngini, nihinöniniki Ngohi." **36** "Jou, Jou nomau kiaika noiki?" o Simon Petrus wileha o Yesusika. O Yesus wohaluhu, "Kiaika Ngohi toiki, ngona nakunua nohiniki örahanënanga. Maduruino ngona aha nohi niki Ngohi." **37** O Petrus wolehaokali, "Jou, yadodoa ngohi takunua toniniki Jou örahanënanga?" "Ngohi toigo tohonenge mangale Ngona Jou!" **38** O Yesus wibaluhu, "Igoungu ngona noigo nohonenge mangale Ngohi? Nohiöriki, o kuru-kuru ihorenuahi, ngona mahange i böto notemo, ngona nohinäkoua Ngohi!"

14:1 O Yesus watemo onangika, "Uha niahininga ibaliha." "Niwi ngaku ma Jou Madutu, dé nihingaku Ngohino. **2** Tongohi ahi Ama Ai tauoka, naga kahangöe o gogere mangi. Ngohi toiki genangika, tohidiai tingini niangi. Ngohi aha takunua totemo hokogënanga nginika, hokä nako

gënanga hokogenangua. **3** Nako Ngohi toikoka tohidiai tingini niangī, Ngohi aha tolio dé Tini ngoho ngini, hupaya kiaka Ngohi naga, genangokaö ngini naga. **4** O ngī Ngohi to oi-oikika, ngini nihi öriki mangëkomo." **5** Daha o Tomas wotemo o Yesusika, "Jou, ngomi mihiörikua kiaika Jou noiki, sarakia ngomi mihiöriki mangëkomo?" **6** O Yesus wibaluhu, "Ngohi o ngëkomo mangale iwinäko ma Jou Madutu dé yamäke o ngango. O nyawa moiua yakunu yaika o Amaika, nako kodede Ngohiua. **7** Hokä nako ngini nihinäko Ngohi, marai ngini aha niwinäko Tongohi Ahi Amaö. Orahamënanga ngini niwinäkoka Unanga, dé niwimäkeoka Unanga." **8** O Filipus wotemo o Yesusika, "Jou, nomihi matoka o Ama gënanga ngomino, hupaya ngomi iholoi miwinäko." **9** Mä o Yesus wibaluhu, "Hoko gënanga madekana Ngohi dede ngini, dé ngona kanohinäkouahi Ngohi, Filipus? O nyawa ihi mäkeoka Ngohi iwimäkeoka o Ama. Sarakia ngona yakunu notemo, 'Nomihi matoka o Ama ngomino'?" **10** Filipus! Ngona kano ngakuahi, Ngohi kamo de o Ama, dé o Ama kamo de Ngohi? Okia Ngohi totemoka nginika, Ngohi totemoua Ahi dirino mahirete. O Ama wotatapu kamo de dede Ngohi, Unanga womanarama mata-mata gënanga. **11** Nongaku Ngohino, Ngohi kamo de o Ama, dé o Ama kamo de Ngohi. Ekola makuranguku, nongaku hababu okia Ngohi tadiaioka. **12** Igoungu itiai Ahi demo nënanga: O nyawa yongaku Ngohino, aha yadiai okia Ngohi tadiaioka, -- de Unanga aha wadiai iholoi ilamokoli -- hababu Ngohi toiki Ahi Amaika. **13** Dé okia dika ngini nigahoko de Tongohi ahiromanga, gënanga aha Ngohi tadiai mangale ngini, hupaya o Ama iwihimulia mangale o Ngohaka. **14** Okia dika ngini nigahoko de Tongohi ahi romanga, aha Ngohi tadiai." **15** "Nako ngini nihihininga Ngohi, ngini aha nihidagi hagala Ahi pareta tongohi. **16** Ngohi aha togahoko o Amaika, dé Unanga aha winihidöaka nginika o Roriwo mahomoa, aha wogogere dede ngini kahi ado-adonika. **17** Unanga gënanga ma Jou Madutu ai Womaha aha ihimatoko ma Jou Madutu aidiai. O dunia iwitarimaua Unanga, hababu iwimäkeua ekola iwinakoua. Mä ngini niwinäko Unanga, hababu Unanga wogogere dede ngini dé aha kamo de dede ngini. **18** Ngohi aha tinimalaikaua ngini hokä o gohihi. Ngohi aha toböa nginika. **19** Mahou kabotinokahidika o dunia aha ihimäke okaua

Ngohi. Mä ngini aha nihimäke Ngohi. De hababu Ngohi towango, nginiö aha niwango. **20** Nako yadono o wange gënanga, ngini aha nihiöriki Ngohi kamoï de o Ama, ngini kamoï de Ngohi, dé Ngohi kamoï de ngini. **21** O nyawa yatarima hagala Tongohi ahipareta de yadiai, ünanga wohihininga Ngohi. Tongohi ahi Ama aha wahininga o nyawa ihihohininga Ngohi. Ngohiö aha tahininga o nyawa gënanga dé tomahimatoko Ahi diri Ngohi unangika." **22** O Yudas (o Yudas Iskariotua) woleha o Yesusika, "Jou, yadodoa Jou nomau nomahimatoko Ani diri ngomino dé o duniaika kowali?" **23** O Yesus wibaluhu, "O nyawa ihihininga Ngohi, aha yamoteke Tongohi ahi dodötoko. Ahi Ama aha wihininga ünanga. Ahi Ama dé Ngohi aha miböa unangika dé migogere dede ünanga. **24** O nyawa ihihiningaua Ngohi, yamotekua Tongohi ahidodötoko. O dodötoko ngini ni ihe-ihene gënanga, Ngohi okaua, mä Ahi Amaino wohihulo-huloko Ngohi. **25** Mata-mata gënanga Ngohi tahetongo nginika hokokia madekana ngini dede Ngohi. **26** Mä ma Jou Madutu ai Womaha, o Roriwo aha wahuloko Ahi Ama de Tongohi Ahi romanga, ënanga aha inidotoko ngini hagala mata-mata, dé inihihohininga ngini aha mata-mata, Ngohi tinihi ngahu-ngahuoka nginika. **27** O dame Ngohi tini gumala nginika. Ahi dame Ngohi mahirete, Ngohi tinihidöaka nginika. Ngohi tinihi döaka gënanga hokä o duniaua inihidöaka nginika. Uha nibaliha, uha nihawana. **28** Ngini ni ihenoka Ngohi totemo, 'Ngohi aha toiki, mä Ngohi aha toboali nginika'. Nako ngini nihihininga Ngohi, ngini aha nimörene Ngohi toiki o Amaïka, hababu ma Ama iholoi wolamoko dede Ngohi. **29** Orahanënanga, Ngohi tohingahu nginika, ngaro mata-mata koidadiuahi, hupaya nako de imadadi, ngini aha ningaku. **30** Ngohi aha totemokaua iholoi iwöe dede ngini, hababu yadonoka maöraha o dunia nënanga makuaha iböa. Mä enanga yakuahaua Tongohi Ahi diri. **31** Ngaro mata-mata gënanga kiani idadi hupaya o dunia yamäo Ngohi tihininga o Ama dé Tadiai hagala wohihiparetaka o Ama Ngohino. Aa, niaino, ngone homa jobo de o ngi nënanga."

15:1 O Yesus wotemoli, "Ngohi o angguru maröehe madutu, dé Ahi Ama naga o dumule madutu. **2** Moi-moi majaga Ngohioka ihohokua, yaoto

yatobiki, dé moi-moi majaga ihohohoko yapoporo mahoka dé yatebini hupaya iholoi iwöeoli mahohoko. **3** Ngini nitebinoka karana o dodötoko Ngohi tohidöaka nginika. **4** Nitatapu nirimoi dede Ngohi, dé Ngohiö aha totatapu torimoi dede ngini. Majaga mahirete yakunua ihohoko, kokiani nako ënanga itatapu maröehika. Hokogenangö ngini duga-duga yakunu nihohoko, nako nitatapu nirimoi dede Ngohi. **5** Ngohi o angguru maröehe, dé ngini majaga-jaga. O nyawa yotatapu yorimoi de Ngohi, dé Ngohi dede önanga aha yohohoko iwöe; hababu de kode Ngohiua, okia-kiaua ngini niakunu niadiai. **6** O nyawa yotatapua yorimoi dede Ngohi, aha yäumo hokä o jaga, daha idadi itoolenge. Jaga-jaga hokogënanga aha yatoomu dé yaumo o uku magoronaika, daha youku. **7** Nako ngini nitatapu nirimoi dede Ngohi dé Tongohi ahidodötoko igogere niahininga magoronaka, nigahoko o Amaika okiadika ngini niamau, niagogahoko gënanga aha ihi totomo. **8** Nako ngini nia hohoko iwöe, Ahi Ama iwihimulia; dé de hokogënanga ngini igou-goungu nidadi nihinöniniki Ngohi. **9** Hokä o Ama wohihininga Ngohi, hokogenangö Ngohi tinihininga ngini. Kiani ngini nitatapu niwango hokä o nyawa Ngohi tahohininga. **10** Nako ngini nihidagi Ahi pareta-pareta, ngini tatapu nisetia Tongohi ahidoraika, hokä imatero Ngohi tatapu tosetia Tongohi ahi Ama Ai doraika hababu Tohi dagi Ai pareta-pareta. **11** Mata-mata nënanga Ngohi tinihingahu nginika, hupaya Ahi mörene naga niahininga magoronaka, dé niamörene idadi iahumu. **12** Nënanga Tongohi ahipareta: nimateke hininga moi de moi, hokä imadäene de Ngohi tinihininga ngini. **13** O nyawa duru yahininga manga hoba-hobata gangala o nyawa ihidöaka manga wowango mangale önanga. **14** Ngini ganga Tongohi ahihoba-hobata, nako ngini niadiai okia Ngohi tinihipareta nginika. **15** Ngini, Ngohi tiniahokokaua o gilaongo, hababu o gilaongo wohiorikua okia wamanarama aituanga. Ngini Ngohi tiniahoko hobata, hababu mata-mata Ngohi toihene Ahi Amaino, Ngohi tinihi ngahuoka nginika. **16** Nginiua nihiiriki Ngohi. Ngohi tiniiriki ngini, dé Tinihuloko ngini nioiki mangale nihohoko iwöe -- o hohoko-hohoko yakunua ibinaha. Ma Ama aha winihidöaka nginika okia dika ngini nigahoko Unangika de Tongohi ahiromanga. **17** Nenangala Ahi pareta nginika: Nima tekehininga moi de moika." **18** "Nako o dunia inidohata

ngini, niohininga Ngohi iholoi ihiraka ihidohata dunia. **19** Hokä nako ngini todunia, ngini aha inihininga o dunia hokä toënanga. Mä Ngohi tiniirikoka o duniaino nënanga, hÒ ngini toduniaokaua. Hababu gënanga o dunia inidohata ngini. **20** Niohininga okia Ngohi totemoka nginika, 'O gilaongo iholoiua wolamoko de aituanga.' Nako önanga ihianiayaoka Ngohi, önanga aha inianiaya nginiö. Nako önanga yamoteke Tongohi ahi dodötoko, onangö aha yamoteke tinginiö niadodötoko. **21** Mata-mata gënanga aha önanga yodiai inihimanga nginika, hababu ngini nihinöniiki Ngohi, hababu önanga iwinäkoua Unanga wohihöhulo-huloko Ngohi. **22** Hokä nako Ngohi toböaua dé tohidemoua mata-mata gënanga onangika, önanga yobaradohaua. Mä örahanënanga önanga koiwaka manga hababu mangale to önanga manga baradoha. **23** O nyawa ihidohata Ngohi, iwidohata Ahi Ama. **24** Hokä nako manga hidogoronaka önanga Ngohi tadiaiua okianaga komaiwahi yadiai o nyawa mahomoa, önanga yobaradohaua. Mä örahanënanga önanga yamäkeoka okia Ngohi tadiaioka, dé önanga ihidohata Ngohi yaoa Tongohi ahi Amaö. **25** Mä kiani hokogënanga iböto hupaya idadi okia itulihoka toönanga manga Tita ma Buku magoronaka, enagënanga: 'Onanga ihi dohata Ngohi koiwa mahababu.' **26** Ngohi aha tihuloko nginika o Roriwo ma ahali Ahi Amaino. Unangala o Womaha aha wohimatoko o diai mangale ma Jou Madutu. De nako Unanga woböa, Unanga aha wohidöaka o hakihi mangale Ngohi. **27** Dé nginiö kiani nihidöaka o hakihi mangale Ngohi, hababu ngini dede Ngohi horimoioika kamahirahi.

16:1 Mata-mata gënanga Ngohi tinihingahuoka nginika hupaya ngini uha nisetiaokaua. **2** Ngini aha inihihupu o puji matau-tauoka. Dé aha iböa maöraha o nyawa initoma ngini, önanga aha yatobote gënanga o leleani moi ma Jou Madutuika. **3** Onanga yodiai gënanga nginika, hababu önanga iwinäkouahi o Ama, yaoa Ngohi. **4** Mä örahanënanga Totemo gënanga nginika, hupaya nako gënanga imadadi aha, ngini niohininga Ngohi tinihi ngahuoka nginika." "Kamamulaengohi o hali nënanga Tinihingahua nginika, hababu Ngohi kadede nginiohi. **5** Maöraha nënanga Ngohi aha toiki Unangika wohihulo-huloko Ngohi; dé moiua ngini nileha kiaika

Ngohi toiki. **6** Orahamänanga niahininga idadi idogo iduka, karana Ngohi totemo o hali nänanga nginika. **7** Mä Ngohi totemo nginika de madaia: Iholoi yaoa mangale ngini, nako Ngohi toiki; hababu nako Ngohi toikua, o Roriwo gänanga aha iböaua nginika. Mä nako Ngohi toiki Ngohi aha Tihuloko Unanga nginika. **8** Nako Unanga woböa, Unanga aha wohimatoko o duniaika mamangarati madaia, mangale o baradoha, okiaoka madaia, dé ma Jou Madutu aihukumanga. **9** Unanga aha winihimatoko ihingakua Ngohino ganga o baradoha; **10** Ngohi itiai, karana Ngohi toiki o Amaika dé ngini aha nihimäkeokaua Ngohi; **11** dé ma Jou Madutu womulaengoka wahukumu, hababu o dunia makuaha nänanga wahukumoka. **12** Mangöeohi Ngohi tomou tinihingahu nginika, maöraha nänanga ngini niakunuahi niatarima. **13** Mä nako o Womaha gänanga iböa, enagänanga Unanga wohimatoko o diai mangale ma Jou Madutu, ngini aha inituda mangale nianäko mata-mata o diai. Unanga aha wotemoua Ai dirino mahirete, ma wohidemo okia woihenoka, dé Unanga aha winihingahu nginika okia aha idadi o wange maduruino. **14** Unanga aha wohihimulia Ngohi, hababu okia wohiädono nginika, watarima Ngohino. **15** Mata-mata naga Ahi Amaka ganga ka Tongohi madutu. Hababu gänanga Ngohi totemo okia o Womaha wohiädono nginika, yatarima Ngohino." **16** "Oraha mahuhutulokahi dika, ngini nihimäkeokaua Ngohi, dé oraha mahuhutulokahioli dika ngini aha nihimäke Ngohi." **17** Yamuruono naga iwinöniniki o Yesus yomuläenge imake leha moi de moika, "Okia madungutu Unanga wotemo ngoneino: 'Oraha mahuhutulokahi dika, ngini nihimäke okaua Ngohi, dé oraha mahuhutulokahioli ngini aha nihimäke Ngohi'? De okiali Ai dungutu de: 'Ngohi toiki o Amaika?'" **18** Onanga yoleha gila-gila, "Okia mamangarati, 'öraha mahuhutulu'? Ngone homangaratiua Unanga wotemo mangale okia!" **19** O Yesus wohiöriki önanga yomau iwileha Unangika. HÒ Unanga watemo, "Kangano Ngohi totemoka, 'Oraha mahuhutulokahi dika, ngini aha nihimäke Ngohi'. Gänanga ngini nialeha niahidogoronaka? **20** Ningaku, ngini aha niari dé nidodora, mä o dunia aha imörene. Ngini aha niahininga ihuha, mä niahuha gänanga aha ingali idadi o mörene. **21** Nako o ngoheka momatëngo itigioka momagilianga, münanga amihininga ihuha,

hababu maōraha yadonoka münanga mohangihara. Mä hokogēnanga amingohaka ima kilauoka, o ngoheka gēnanga aha mawohangoka amihangihara karana ami mörene o nyawa moi o ngohaka imakilauoka o duniaino. **22** Hoko genangoli de ngini: Orahamēnanga ngini niahininga ihuha, mä Ngohi aha homaka mäkeoli dede ngini, niahininga aha imörene; dé moiua o nyawa yakunu yalē niamörene gēnanga niahiningaka. **23** O wange gēnanga, ngini aha nileha okia-kiakaua Ngohino. Ningaku: Okia dika ngini nigahoko o Amaika de Tongohi Ahi romanga, gēnanga aha winihidōaka o Ama nginika. **24** Hiädono öraha nēnanga ngini nigahokuahi okia naga de Tongohi Ahi romanga. Nigahoko, ngini aha niatarima, hupaya niamörene itotomo." **25** "Mata-mata nēnanga Ngohi totemoka nginika de o hitotero. Mä aha iböa maōraha, Ngohi tapäke okaua o hitotero, mä tohidemo tohitotararonuku nginika mangale o Ama. **26** Orahagēnanga ngini aha nigahoko o Amaika de Tongohi Ahi romanga; nihiöriki, Ngohi aha togahokokaua o Amaino mangale ngini, **27** hababu o Ama mahirete winihininga ngini. Unanga winihininga ngini hababu ngini nihihininga Ngohi, dé ningaku Ngohi toböa ma Jou Madutuino. **28** Igoungu Ngohi ahi ahali o Amaino, dé Toböaka o dunia magoronaka. Mäoraha nēnanga Ngohi tamala o dunia mangale tolio o Amaika." **29** Daha iwinöniniki o Yesus yotemo Unangika, "Orahamēnanga Jou notemo nohi totararonika dé napäkeua o hitotero, **30** dé ngomi mihiöriki Jou nohiöriki hagala mata-mata. Iparaluaa kao nyawa moiö de inileha okia honanga ngonaika Jou. Hababu gēnanga ngomi mingaku Jou noböa ma Jou Madutuino." **31** O Yesus wabaluhu önanga, "HÖ ningaku ngini örahamēnanga? **32** Niohohininga! Maōraha aha iböa, de iböaka, ngini aha hohinihikokabarihi. Ngini aha nilio niatauika moi-moi dé nihidogumalaika Ngohi tomatēngoka. Mä Ngohi tomatēngookaua hababu o Ama naga dede Ngohi. **33** Mata-mata nēnanga Ngohi tahetongoka hupaya ngini niamäke o dame hababu ngini kanoi dede Ngohi. O duniaka ngini aha nihangihara. Mä nihibitumu niahininga! Ngohi tautumoka o dunia!"

17:1 Ipaha wotemo hokogēnanga, o Yesus womamataga o dihangile dé wotemo, "Ama, örahamēnanga yadonoka maōraha. Nihimulia Ani

Ngohaka, hupaya Ani Ngohakö wonihimulia Ama. **2** Ama nohihidöakoka o kuaha o umati o nyawa mata-mata o Ngohakika, hupaya Unanga wahidöaka o ngango madutu dé i kokakali o nyawa mata-mataika, Ama nihidöa-döakoka Unangika. **3** Nënanga o ngango madutu dé ikokakali; hupaya o nyawa ininäko Ama Jou Madutu madaia nomadinga-dingakoka dé iwinäko o Yesus Kristus, Ama nihulo-hulokoka. **4** Ngohi tonihimuliaka Ama o dunia nënanga malokuoka, dé tabötoka o manarama, Ama nohihidöa-döakoka Ngohino. **5** Ama! Orahamënanga Ngohi tonihimulia Amaika, de o mulia Tongohi madutu imakiniki de Ngona Ama kao dunia nënanga idadiö de kowahi. **6** Ngohi tonihinäkoka Ama hagala o nyawaika o duniaino nënanga, Ama nohihidöa-döakoka Ngohino. Onanga ganga kato Ngona Ama, dé Ama nohihidöa-döakoka önanga Ngohino. Onanga yamotekoka Anidemo Ama. **7** Orahamënanga önanga ihiöriki mata-mata Ama nohidöakoka Ngohino ma ahali Ngonaino Ama. **8** Ngohi tohi adonoka onangika Anidemo Ama nohidöa-döakoka Ngohino; dé onanga yatarimaka. Onanga ihiöriki de madaia Ngohi toböa Amaino dé onanga yongaku Ama nohihuloko Ngohi. **9** Ngohi toma niata mangale önanga. Ngohi toma niatua mangale o dunia mä mangale hagala o nyawa Ama nohihidöa-döakoka Ngohino, hababu önanga ganga kato Ngona Ama. **10** Mata-mata kato Ngohi, ganga kato Ngonaö Ama; dé mata-mata Tongona Ama, ganga kato Ngohiö. Ngohi ihihimulia önanga manga hidogoronaka. **11** Orahamënanga Ngohi toböa Ngonaika Ama. Ngohi togogerokaua o duniaka; mä onanga naga o duniaka. Ama notebi-tebini! Nagöana önanga de Ani romanga makuaha Ama, enagënanga Ani romanga Ama nohidöakoka Ngohino -- hupaya önanga yodadi kamoi, hokä imatero Ama dé Ngohiö kamoi. **12** Maöraha Ngohi kadede onangohi, Ngohi tägoanoka önanga de Ani romanga makuaha Ama -- Ani romanga nohihidöa-döakoka Ngohino. Ngohi tagoanoka önanga dé kao nyawa moiö de önanga yohihangua sowaliua ünanga igoungu kokiani wohihangoka; hupaya de gënanga idadi okia itulihoka Ma Jou Ai Demo ma Buku magoronaka. **13** Orahamënanga Ngohi toböa Amaika. Mata-mata nënanga Ngohi totemoka maöraha Ngohi kao duniakahi; hupaya önanga yamäo yaomanga de Ahi mörene. **14** Ngohi tahiadonoka onangika Ani demo Ama, dé o dunia

yadohata önanga, hababu önanga koto duniaua hokä imatero Ngohiö toduniaua. **15** Ngohi togahokua hupaya Ama nalë önanga o duniaino nënanga, mä Ngohi togahoko hupaya Ama nagöana önanga o Dorouino. **16** Ka ima tero mahali hokä Ngohi toduniaua, onangö toduniaua. **17** Nahi dadi önanga, kato Ngona Ama madutu noma dinga-dingakoka o diai; Ani demo Ama gënanga o diai. **18** Hokä Ama nohikulokoka o duniauku, hoko genangö Ngohi tahuloko önanga o duniaika. **19** Mangale to önanga manga wowango mahidoku, Ngohi toma hilapahi Ahi diri hokä Tongona madutu Ama, nomadinga-dingakoka hupaya onangö yodadi kato Ngona madutu Ama nomadinga-dingakoka de mangëkomo o diai. **20** Mangale ka onangua nënanga dika Ngohi toma niata. Ngohiö tomaniata mangale hagala o nyawa aha ihingaku Ngohino de to önanga manga hakihi nënanga. **21** Ngohi togahoko, Ama hupaya önanga mata-mata yodadi kamoi, hokä Ama kamoi dede Ngohi, dé Ngohi dede Ngona Ama. Tanu önanga yodadi moi dede ngone, hupaya o dunia yongaku Ama nohikulokoka Ngohi. **22** Ngohi tahidöakoka onangika o mulia Ama nohidöa-döakoka Ngohino, hupaya önanga yodadi moi, hokä ima tero Ngoneö kamoi; **23** Ngohi dede önanga, dé Ama dede Ngohi; hupaya önanga igou-goungu kamoi. O dunia aha ihiöriki Ngona Ama nohikuloko Ngohi, dé Ama nahininga önanga hokä Ama nohininga Ngohi. **24** Ama, Ngohi toigo hupaya önanga, Ama nohidöaka Ngohino, naga dede Ngohi o ngi kiaka naga Ngohi, hupaya önanga yamäke Tongohi Ahi mulia; enagënanga Ani mulia Ama nohidöa-döakoka Ngohino, hababu Ama nohininga Ngohi o dunia kai dadiö dekowahi. **25** Ama noadi-adili! O dunia ininäkoua Ama, mä Ngohi toninäko Ama; dé hagala o nyawa nënanga ihiöriki Ama nohikuloko Ngohi. **26** Ngohi tahimatokoka Ani romanga Ama onangika; dé Ngohi aha gila-gila todiai hokogënanga, hupaya Ani dora Ama Ngohino itatapu manga hininga magoronaka dé Ngohi kamoi dede önanga."

18:1 Hokogënanga o Yesus woma niata iböto, Unanga de iwinöniniki yoiki yatobongo o Kidron ma Ngairi. Genangoka naga o dumule moi, dé o Yesus de iwinöniniki yowohama o dumuleika gënanga. **2** O Yudas

wohininga dorou gënanga, wohiöriki o ngi gënanga; hababu o Yesus mamoi-mamoi imatoomu genangoka de iwinöniñiki. **3** O Yudas woiki o ngi ika gënanga de waao o duduono moi o tentara Romawi dé yamuruono naga ma Jou Madutu ai Tau magogöana yamäke o huhuloko o imam-imam manga häekino dé o Farisioka manyawaino. Onanga imagao o daë, o lantera dé o oboro. **4** O Yesus wohiöriki mata-mata aha idadi Ai dirika. HÒ Unanga womahi tigi hagala o nyawaika gënanga dé waleha, "Ngini nialingiri o nagona?" **5** Onanga yohaluhu, "O Yesus o Nazaret manyawa." O Yesus wato, "Ngohila Unanga." O Yudas wohininga dodorou womaokoino genangoka dede önanga. **6** Maöraha o Yesus watemo onangika, "Ngohila Unanga," önanga mata-mata yodohuku dé yoruba o tonakuku. **7** Mamoioli o Yesus waleha onangika, "Ngini nialingiri o nagona?" Onanga yohaluhu, "O Yesus Nazaret manyawa." **8** O Yesus wato, "Ngohi totemo iböto Ngohila Unanga." "Dé nako igoungu Ngohi ngini nihilingiri, niamalaika önanga mahomoa nënanga yoiki." (**9** De wotemo hoko gënanga, imadadi okia o Yesus wohidodemo iböto ngaro kowahi de gënanga: "Ama, o nyawa Ama nohihidöa-döakoka Ngohino, kao nyawa moiö de yohihangua.") **10** O Simon Petrus womagaoino o oworo moi, warahuku daha wioto o imam womomulia aigilaongo hiädono ipageloka aingauku manirakoka. O gilaongo gënanga airomanga o Malkus. **11** O Yesus wotemo o Petrusika, "Nohi ngohamoli anioworo maharunguku! Okia ngona napikiri Ngohi aha taokerua o hangihara magalahi o Ama wohihidöakoka Ngohino?" **12** Daha o Romawi matentara de manga baluhu dé o Yahudioka yagöa-göana iwitagoko dé iwiliko o Yesus. **13** Madodihiraka önanga iwiao o Yesus wihimanga o Hanas, o Kayafas aitoroa. O Kayafas ganga o imam womomulia o taongo gënanga. **14** Dé unangala wanasihatoka o Yahudi manyawa yokokuaha, iholoi yaoa o nyawa womatëngo wohonenge mangale o hoana yongodumu. **15** O Simon Petrus dé womatëngo iwinöniñiki mahomoa iwiniki o Yesus. Wonöniñiki mahomoa nënanga winäko ma imam womomulia; hÒ unanga witomoteke wowohama dede o Yesus ma imam womomulia aita malöaika, **16** ma o Petrus wotamä maporetoka, o ngoranoka. Winöniñiki mahomoa gënanga woiki wohupu

dé womi temo o ngoheka molöleleani o ngorana magogöana, daha wiao o Petrus wihingohama magoronaika. **17** O ngoheka molöleleani o ngorana magogöana gënanga mitemo o Petrusika, "Hei, koigoungua ngonaö o nyawa ninöniñiki o nyawa gënanga?" "Kowali," o Petrus wohaluhu. **18** O öraha gënanga o alo kohamäta, hÒ yolöleleani dé yogo göa-göana imadofoile o uku dé onanga imarauku genangoka. O Petrus woiki genangika dé womaokoino womarauku dede önanga. **19** O imam womomulia wileha o Yesus mangale iwinöniñiki dé mangale Ai dodötoko. **20** O Yesus wohaluhu, "Ngohi hoko genangika totemo tohitararonuku o nyawa yowöe-wöe manga himangoka. Ngohi hokogenangika tadotoko o puji matau-tauoka dé ma Jou Madutu ai Tauoka, o ngi Yahudioka manyawa biaha ima totoomu. Komaiwahi Ngohi totemo okia naga de toma ngiu-ngiunu. **21** HÒ yadodoa Tuanga nohi leha Ngohi? Naleha önanga yoihe-ihenoka Ngohi tadotoko. Maraioka önanga ihiöriki okia Ngohi totemoka." **22** Maöraha o Yesus wotemo hokogënanga, womatëngo wogo göa-göana genangoka wipoka dé wato, "Duru nobarani, Ngona notemo hokogënanga ma imam womomuliaika!" **23** O Yesus wohaluhu, "Nako Ngohi totemo okianaga moi ihowono, nahetongo nenangoka okia mahowono! Mä nako Ngohi totemo gënanga igoungu itiai, yadodoa ngona nohipoka Ngohi?" **24** Dahao o Hanas wahuloko o nyawa iwiao o Yesus de aililikoka ma Imam womo Muliaika o Kayafas. **25** O Simon Petrus kawoma okoinohi womarauku genangoka. O nyawa yotemo unangika, "Koigoungua ngonaö ninöniñiki o nyawa gënanga?" Mä o Petrus womahi pongono wato, "Kowali!" **26** O nyawa womatëngo ma imam womomulia aigilaongo, enagënanga o riadodoto de o nyawa aingauku waoto-oto o Petrus, wato, "Koigoungua ngohi tonimäkeoka ngona o dumuleoka gënanga dede ünanga?" **27** Daha o Petrus wihi pongonoli, "Kowali," -- dé maöraha duru ima kokoronaika gënanga o kuru-kuru ihorene. **28** Duru ngoru-ngoruminohi önanga iwiao o Yesus o Kayafas aitaouka de magubernur aikadatoika. O Yahudioka manyawa mahirete yowohamua o kadato magoronaika, hupaya önanga uha yodadi yopeseke imoteke o agama madodagi, hababu önanga yomau yaniki yolomo o Paskah mangolomoka. **29** Karana gënanga o Pilatus woiki wohupu

onangika dé waleha, "Okia nia galaki o nyawa ne Unangika?" **30** Onanga yohaluhu, "Hohiade Unanga koiwa Ai howono, ngomi aha miwiaoua ma Bapa Gubernurika." **31** O Pilatus watemo onangika, "Niwi lë Unanga de niwi hakimi Unanga imamoteke niahukumu mahirete!" Mä o Yahudioka manyawa gënanga yohaluhu, "Ngomi yakunua miahukumu o nyawa yohonenge." (**32** Nënanga idadi hupaya iganapu okia o Yesus wotemoka yadäene madodagi Unanga aha wohonenge.) **33** O Pilatus wowohamoli ai kadatoika dé wiahoko o Yesus, dahao wileha, "Boteka Ngona o Yahudioka manyawa manga koano?" **34** O Yesus wohaluhu, "Okia aniloleha nënanga ngonaino mahirete ekola naga o nyawa mahomoa inihingahuoka ngonaika mangale Ngohi?" **35** O Pilatus wohaluhu, "Bote ngohi o Yahudioka manyawa? Inihi lolapahi Ngona ngohino ganga Ani nyawa mahirete dé o imam-imam manga häeke. Okia Ngona nodiaioka?" **36** O Yesus wotemo, "Ngohi ahi pareta o duniainoua nënanga. O demo maade nako Tongohi ahipareta o duniaino nënanga, Tongohi ahi nyawa aha yalawani hupaya Ngohi uha ihihilapahi o Yahudioka yokokuahaika. Mä igoungu Tongohi ahi pareta o duniainoua nënanga!" **37** O Pilatus wileha Unangika, "Nako hokogënanga, Ngona o koano?" O Yesus wohaluhu, "Ngona notemoka Ngohi nënanga o koano. Ngohi tomakilau dé toböa o duniaka mangale madumutu moi, enagënanga tohidöaka o hakihi mangale o diai. O nyawa o diaino gënanga ihihigihene Ngohi." **38** O Pilatus wileha Unangika, "Okia mamangarati o diai?" Daha o Pilatus wohupuoli ai kadatoino dé watemo o Yahudi manyawaika, "Ngohi tamäke okia-kiaua Ai howono Unangoka. **39** Mä imoteke niabiaha, ngohi kiani tihilapahi o hohowono manyawa womatëngo o Paskah ma Wange ma Amokoka. Nioigo ngini hupaya ngohi tihilapahi o Yahudioka manyawa manga koano mangale ngini?" **40** Onanga yohaluhu de ima pöa-pöaka, "Kowali, uha Unanga, mä o Barabas!" (O Barabas ganga o nyawa moi wo ora-ora.)

19:1 Ipaha de gënanga o Pilatus wowohama dé wähuloko o nyawa iwi gohara o Yesus. **2** O tentaraka yodiai o makota moi o gota majaga-jaga de mahohihikaka, daha iwihit tamunuku o Yesus ai häeke malokuoka. Iböto

de gënanga önanga iwihino noa Toünanga aijuba magoguhurungu, **3** daha iwigogilio yoböa Unangika dé yotemo, "Nowango o Yahudioka manyawa manga koano!" Aha ino iwipoka Unanga. **4** Iböto de gënanga o Pilatus wohupu wohigalioli dé wotemo o nyawa yowöe-wöeika gënanga, "Niwi lega! Ngohi tiao Unanga tihihupu nginika, hupaya ngini nihiöriki kamoio de ngohi tamäkeua o howono Unangoka." **5** O Yesus wohupu de iwihino tamunuku o makota mahohihika de Ai juba magoguhurungu. O Pilatus watemo onangika, "Niwi lega o nyawa gënanga." **6** Maöraha o imam-imam manga häeke dé yogogöa-göana gënanga iwimäke o Yesus, önanga yopöaka, "Niwi salib Unanga! Niwi salib Unanga!" O Pilatus watemo onangika, "Niwi lë Unanga, dé niwisalib ngini mahirete, ngohi kamoio de tamäkeua o howono Unangoka." **7** O Yahudioka manyawa gënanga yohaluhu, "Imoteke tongomi mia hukumu, Unanga kiani iwihukumu wohonenge hababu Unanga woma ngaku Ai diri ma Jou Madutu ai Ngohaka." **8** Maöraha o Pilatus woihene önanga yotemo hokogënanga, ünanga iholoi wohawanoli. **9** Unanga wohi galioli wowohama ai kadato magoronaika, de o Yesus iwiao iwihino ngohama, o Pilatus wileha Unangika, "Ngona ani ahali okiaino?" Mä o Yesus wohaluhua. **10** HÖ o Pilatus wotemoli, "Ngona noluku notemo dede ngohi? Nohiöriki, tongohi ahi kuaha toni hilapahi Ngona, dé tokuaha toni salib Ngona!" **11** O Yesus wohaluhu, "Nako ma Jou Madutu wonihidöakua o kuaha gënanga ngonaika, ngona kautuö de koiwa anikuaha Ngohino. Karana gënanga o nyawa ihihino lolapahi Ngohi ngonaika, iholoi ilamoko manga baradoha ngaro de ngona ma." **12** Maöraha o Pilatus woihene gënanga, ünanga wohidailako mangale wihilapahi o Yesus. Mä o Yahudioka manyawa yopöa-pöaka, "Nako Tuanga nihilapahi Unanga, Tuanga ma Kaisarua ai dodiawo! O nyawa imangaku yokoano, ganga ma Kaisar aihaturü!" **13** Maöraha o Pilatus woihene o demo-demo gënanga, ünanga wiao o Yesus wihihupu daha wogogeruku o kuruhi mangi yatotailako o nyawa manga hali maromanga ma Nanao o Helewo. (De o Ibranioka manga demo maromanga Gabata.) **14** Oraha gënanga ngade yadono o takoro ngimoi de hinoto o wangeoka, mawange yadonuahi o Paskah ma Wange ma Amoko. O Pilatus watemo o

nyawaika gënanga, "Nënanga nia koano!" **15** Onanga imapöa-pöaka, "Niwi toma Unanga! Niwi toma Unanga! Niwi salib Unanga!" O Pilatus wäleha, "Kiani ngohi tisalib nia koano?" O imam-imam manga häeke yohaluhu, "Duga-duga ma Kaisar woma tēngo-tēngo tongomi mia koano!" **16** De o Pilatus wihilapahi o Yesus onangika la iwi salib. Onanga iwilē o Yesus daha yoiki iwiao Unanga. **17** O Yesus wohupu de wamoku mahirete Ai salib o ngī ika maromanga "O häeke ma Kabelanga ma Ngī." (De o Ibranioka mademo ihiromanga Golgota.) **18** Dokengoka Unanga iwisalib. Yahikiniki de Unanga nagaō yahinoto o nyawa mahomoa yasalib; womatēngo Ai higiloka, womatēngo Ai nirakoka dé o Yesus mahidodogoronaka. **19** O Yesus aisalib magotaika, o Pilatus wahuloko yatulihi de madulihi hokonēnanga: "Yesus Nazaretino, o Yahudioka manyawa manga Koano". **20** O Yahudioka manyawa manga ngöe yabasa o dulihi gënanga hababu o ngī o Yesus iwisosalib gënanga ikurutikaua de o kota. O dulihi gënanga de o Ibranioka, o Latinoka dé o Yunanioka mangademo. **21** O imam-imam manga häeke yotemo o Pilatusika, "Uha natulihi 'O Yahudioka manyawa manga Koano', mä natulihi, 'O nyawa nēnanga wotemo, Ngohi o Yahudioka manyawa manga Koano.'" **22** Mä o Pilatus wohaluhu, "Ngohi tatulihi iböto, tatapu itulihoka." **23** O tentara-tentara gënanga iwisalib iböto o Yesus, önanga yalē Ai pakeanga. Pakeanga gënanga yaregu iata: moi-moi yamäke o hidoku moi. Onanga yalē o Ai juba. Ai juba gënanga koiwa maguguriti -- kaimahi paronuku daku de yauku hiädono daukuku. **24** O tentara-tentara gënanga imaketemo moide moika, "Uha ngone hatobi-tobiki o juba nēnanga. Niaino ngone hodiai o undi la o nagona yakunu yadäene." O hali gënanga idadi hupaya iganapu okia i tulihi Ma Jou Ai Demo ma Buku magoronaka, enagënanga, "Onanga imahikodoku Ahi pakeanga, dé yodiai o undi mangale ahijuba." Dé i goungu o tentara-tentara gënanga yadiai hokogënanga. **25** O Yesus aisalib madatekoka imaokoino o Yesus ngoi ayo, de ngomi riadodoto o ngoheka, o ngo Maria o Keliopas ngoihkata, dé o ngo Maria Magdalena. **26** Maöraha o Yesus womimäke ngoi ayo de wininiki wihohininga imaokoino genangoka, Unanga wotemo ngoi ayoika, "Ayo, gënanga aningohaka Ayo." **27** Dahaino o Yesus wotemo wininikika gënanga,

"Gënanga ngoni ayo." Oراها de gënanga wininiki gënanga womiao o Yesus ngoi ayo mogogere aitaouka. **28** Oراها nënanga o Yesus wohiöriki mata-mata itiaioka, dé hupaya okia itulih Ma Jou Ai Demo ma Buku magoronaka yakunu idadi, Unanga wotemo, "Ngohi ahikiriti madudungu." **29** Genangoka naga o udo-udomo moi ioma-omanga de o angguru ma akere masuka-suka. O bunga karang o gahumu moi yatonouku o angguru ma akeruku gënanga, dé ihi topokika de o gota majaga o hisop, daha yatubo hiädono o Yesus aiuru makaile. **30** O Yesus wahihhi o angguru ma akere gënanga daha wotemo, "I tiai oka!" Daha Unanga Ai häeke waponu de wohonengoka. **31** O Yahudioka manyawa yokokuaha yoluku o nyawa manga mayeti yasosaliboka gënanga hokogënanga inuneuku o salib magotaka o Yahudioka manga Puji mawangeoka, okiali nënanga mamoi o Yahudioka manga Puji mawange gënanga, o Wange ma Amoko yododingakoka. Hababu mawange o Yesus iwisalib iotaka o Yahudioka manga Puji mawangeoka gënanga, o Yahudioka manyawa yogahoko o Pilatusika mangale yatobiki manga lou o nyawa yasosalibika dé ihiguti manga mayeti gënanga o salib magotaka. **32** O tentara-tentara gënanga yoiki dé yatobiki yododihira manga lou yahinoto o nyawa yasosalib de o Yesus. **33** Maöraha önanga yadono o Yesusika, önanga iwimäke Unanga wohonengoka. HÒ onanga yatobikua Ai lou. **34** Máaimahehoika o Yesus ihitopoko de o tuba, womatëngo o tentaraka gënanga; dé madataitoka ihupu o awunu dé o akere. **35** O nyawa wamäke mahirete okia idadi gënanga, ünanga wohingahu o hali gënanga, hupaya nginiö ningaku. Dé aihakihhi gënanga itiai, dé unanga wohiöriki gënanga itiai. **36** O hali gënanga idadi hupaya iganapu okia itulihoka Ma Jou Ai Demo ma Buku magoronaka, enagënanga "Ai kobongo kamoio ma aha koyatobikua". **37** Ma Jou Ai Demo ma Buku magoronakaö itulihhi, "Onanga aha Unanga iwipülono önanga iwi topo-topokoka". **38** Ipaha de gënanga o Yusuf o Arimateaino wogahoko wihigumala o Pilatus la mangale walë o Yesus aimayeti. (O Yusuf nagala winöniniki o Yesus mä kawomangiu-ngiunu, hababu ünanga wamodongo o Yahudioka yokokuahaika.) O Pilatus wihigumala ünanga, hÒ unanga woiki walë o Yesus Ai mayeti. **39** O Nikodemus, mahira woböa-böa o Yesusika maöraha o hutu-hutu, unangö

woiki de o Yusuf. O Nikodemus woao o mur dé o gaharu -- mata-mata done ho o kilo moruange mangöe. **40** O nyawa yahinoto gënanga yalë o Yesus Ai mayeti daha yahawo de o ngöere magare-garehe mahohailoa de o minya mabou-bounu gënanga imoteke manga adati o Yahudioka manyawa yolungunu. **41** O ngi o Yesus iwi salib naga o dumule moi. O dumule magoronaka gënanga naga o lungunu moi mahungi, komaiwahi yahilungunu o nyawa. **42** Hababu o lungunu gënanga i tiginu, dé o Yahudioka manga Puji mawange ngade imuläenge, önanga iwi lungunu o Yesus dokengoka.

20:1 O Minggu mawange o ngoru-ngoruminohi, maöraha kai hohü hutuohi, o ngo Maria Magdalena moiki o lungunika. Münanga mamäke o helewo madadamunu yorehenoka o lungunu mapidahoka gënanga. **2** Münanga momapopäta milingiri o Simon Petrus dé winöniniki wihohininga o Yesus, dé motemo onangika, "Ma Jou iwilëoka o lungunoka, dé ngohi tohiorikua okiaka Unanga iwikelenga." **3** Daha o Petrus dé winöniniki mahomoa gënanga yoiki o lungunika. **4** Yahinoto imapopäta, mä winöniniki mahomoa gënanga iholoi wotaiti de o Petrus, dé unanga womahiädono iholoi wohira o lungunika. **5** Unanga wohihahere o lungunu magoronaika dé wamäke o ngöere magare-garehe ikelengauku genangoka, mä unanga wowohamua. **6** O Simon Petrus wihidoduruino aiporetino, daha gila-gila wowohama o lungunu gënanga magoronaika. Unanga wamäke o ngöere magare-garehe ikelengauku genangoka, **7** mä o ngöere ihiliko-liko o Yesus Ai häekino koiwa madatekoka mailuluino imatingakika. **8** Ahaino winöniniki iholoi wohira womahiädono o lungunika, unangö wowohama. Unanga wamäke dé wongaku. (**9** Hiädono öraha gënanga önanga imangaratiauahi okia i tulihi Ma Jou Ai Demo ma Buku magoronaka Unanga kiani womomiki o honengino.) **10** Ipaha de gënanga iwinöniniki o Yesus gënanga yolio. **11** O ngo Maria Magdalena momaokoino o lungunu mahimangoka de moari. Moari magogiriaka, münanga mohihahere o lungunu magoronaika, **12** daha mamäke o malaekat yahinoto manga pakeanga magare-garehe. Onanga yogogeruku o ngi o Yesus Ai mayeti marioka, moi Ai häekiha idaduoka dé mahomoa Ai

louoko idaduoka. **13** O malaekat-malaekat gënanga imileha, "Ayo, yadodoa noari!" O ngo Maria mohaluhu, "Tongohi ahi Jou iwilëoka, dé ngohi tohi orikua Unanga kiaka iwikelenga." **14** Motemo iböto hokogënanga, münanga moma lega ami poretoko dé mimäke o Yesus womaokoino genangoka. Mä munanga mihiorikua gënanga o Yesus. **15** O Yesus womi leha munangika, "Ayo, yadodoa noari? Ayo nä lingiri o nagona?" O ngo Maria matobote gënanga madumule madutu, hÒ munanga motemo, "Bapa, nako Bapa nitagalioka Unanga nenangoka, tanu nohihingu ngohino okiaka Bapa nikelenga Unanga, hupaya ngohi takunu tilë?" **16** O Yesus womitemo munangika, "Maria!" O ngo Maria moma lega o Yesusika daha motemo de o Ibranioka manga demo, "Rabuni!" (Mamangarati "Guru".) **17** "Uha nohi sö Ngohi," o Yesus womitemo munangika, "hababu Ngohi todoauahi o Amaile. Mä noiki Ahi roriadodotika, dé nahi ngahu onangika örahanënanga Ngohi todoa Ahi Amaile dé Ani Amaile, Ahi Jou Madutuile dé ani Jou Madutu ile." **18** Ho ngo Maria moiki mohingahu iwinöninikika o Yesus münanga mimäkeoka ma Jou dé ma Jou wotemoka mata-mata gënanga munangika. **19** Ma Minggu mawange genangoli dika, maöraha yohutuoka, iwinöniniki o Yesus imatoomu o tau moika de manga ngora-ngorana yakusioka, hababu önanga yämodongo o Yahudioka yokokuahaika. Itodokanino o Yesus woböa dé womaokoino manga hidogoronaka önanga dé watemo, "Nia tabea de o dame dede ngini." **20** Wotemo iböto hokogënanga, Unanga wahimatoko onangika Ai giama dé Ai meheho. Maöraha iwimäke ma Jou, önanga duru yomörene. **21** Gila-gila o Yesus watemo onangika wohi galioli, "Nia tabea de o dame dede ngini. Hokä o Ama wohi huloko Ngohi, hoko genangoli Ngohi tinihuloko ngini." **22** Gila-gila Unanga wahiwuwu Ai womaha onangika dé wotemo, "Niatarima ma Jou Madutu ai Womaha. **23** Nako ngini niahiapongo o nyawa moi manga baradoha, ma Jou Madutuö winihiapongo. Nako ngini niahiapongua o nyawa moi manga baradoha, ma Jou Madutuö winihiapongua." **24** O Tomas, womatëngo o Yesus iwinöniniki yangimoi de yahinoto manga hidogoronaka, (iwi hetongo o "Hago") kodede unangua de aidodiawo mahomoa maöraha o Yesus woböa. **25** Iwinöniniki o Yesus mahomoa iwitemo o Tomasika,

"Ngomi miwi mäkeoka ma Jou!" Mä o Tomas wohaluhu, "Nako ngohi tamäkeuahi o paku mario Ai giamoka, ngohi togelengauahi ahi hagarara Ai nabo o paku marioika gënanga, dé togelengauahi tongohi ahigiana Ai mehehoika, ngohi toluhohi tongaku." **26** O Minggu moi yaino, iwinöniniki o Yesus nagali o ngioka gënanga, dé o Tomasö woböaino. O ngorana mata-mata ikusioka. Mä o Yesus woböa dé womaokoino manga hidogoronaka, daha wotemo, "Nia tabea de o dame dede ngini." **27** Dahaino o Yesus witemo, o Tomasika, "Nakelenga anihagarara nenangoka, dé nolega Tongohi Ahi giama. Nohidöaka anigiana dé nakelenga Ahi mehehoika. Uha nodododatohi, mä nongaku!" **28** O Tomas wotemo o Yesusika, "Ahi Jou, dé ahi Jou Madutu!" **29** O Yesus witemo unangika, "Ngon nongaku hababu nohi mäkeoka Ngohi igoungua? Youtumoka o nyawa yongaku ngaro ihmäkeua Ngohi!" **30** Duru kohangöehi ihëra-hëranga mahomoa wodiai o Yesus iwinöniniki manga himangoka, mä itulihua buku nënanga magoronaka. **31** Mä mata-mata nënanga itulihua, hupaya ngini ningaku o Yesus ganga ma Koano Wohi hohalamati, ma Jou Madutu ai Ngohaka, dé karena iwi ngaku Unangika, ngini niamäke o ngango.

21:1 Ipaha gënanga o Yesus womahimatoko Ai diri wohigalioli o Tiberias ma Taagaka iwinöninikika. Hoko nënanga idadi: **2** O wange moiuku, o Simon Petrus, o Tomas iwiahoko o Hago, o Natanel o Kanaino o Galilea matonakoka, o Zebedeus aingoha-ngohaka, dé yahinoto iwinöniniki o Yesus mahomoa ima toomuino. **3** Watemo o Simon Petrus mahomoaika, "Ngohi tomou toiki totagoko o nawoko." "Ngomi miniki," önanga yotemo unangika. De önanga yoharene o ngotiroko de ima jobo. Mä hutu moi yahaiwatikuku gënanga önanga okia-kiaua yadäene. **4** Maöraha o wange muläenge ipotoka, o Yesus womaokoino o dowongioka, mä onanga iwihiorikua o Yesus gënanga. **5** O Yesus watemo onangika, "Ngoha-ngohaka, naga de nianawokoka?" "Koiwa," önanga yohaluhu. **6** O Yesus watemo onangika, "Nidotumo niahoma niangotiri manirakuku, aha ngini niamäke o nawoko." Daha o homa gënanga önanga yodotumo, mä yakunua yatauroli hababu hoko gënanga mangöe o nawoko o homa

magoronaka. **7** Winōninīki o Yesus wihohininga witemo o Petrusika, "Gēnanga ma Jou!" Maōraha o Simon Petrus woihene gēnanga ma Jou, ünanga womahinoa aibaju (hababu ünanga woma bajua) daha womangumo o akereuku. **8** Iwinōninīki mahomoa yongotiri iwinīki o dudungiha, de yatauru manga homa iomanga de o nawoko. Onanga yokurutikaua de o dudungu, done hometere o ratuhu moi dika. **9** Maōraha ōnanga o ngotiroka de youti, ōnanga yamāke naga o uku mangabocho de dokengoka o nawoko iharongika dé o roti. **10** O Yesus watemo onangika, "Abeika niaoino o nawoko o ngai muruo naga daha nia tago-tagokino." **11** O Simon Petrus kawoharene o ngotiroko, daha yaliliara mangahoma o dudungiha. O homa gēnanga iomanga de o nawoko ma ago-agomo; mata-mata naga o ngai o ratuhu moi de moritoa de hange. De ngaro hoko gēnanga mangōe, manga homa ikakihua. **12** O Yesus wātemo onangika, "Niaino niolomo." Ka o nyawa moiō de koiwa iwinōninīki yobaraniua iwileha, "Bapa o nagona?" Hababu ōnanga ihiōriki Unanga ma Jou. **13** Aha o Yesus woma hitigi onangika, walē o roti gēnanga, dé wahidōaka onangika. Unanga wadai hoko genangoli de o nawoko gēnanga. **14** Nenangala hara mahangeoka o Yesus womahimatoko Ai diri iwinōninīkika ipahaino Unanga iwihī wango o honengino. **15** Ibōto ōnanga yolomo, o Yesus witemo o Simon Petrusika, "Simon, o Yona aingohaka, boteka ngonahi iholoi nohi hininga Ngohi ngaro de ōnanga nēnanga ihi hininga Ngohi?" "Itiai, Jou," o Petrus wohaluhu, "Jou nohihiōriki Ngohi toni hininga Jou." O Yesus wotemo unangika, "Napaliara Ahi duba mangoa-ngohaka." **16** Mahinotoka o Yesus wileha unangika, "Simon, o Yona aingohaka, boteka ngona nohi hininga Ngohi?" "Itiai, Jou," o Petrus wohaluhu, "Jou nohihiōriki ngohi toni hininga Jou." O Yesus witemo unangika, "Napaliara Tongohi ahi duba-duba." **17** Ma hangeoka o Yesus wileha unangika, "Simon o Yona ai ngohaka, boteka ngona nohi hininga Ngohi?" O Petrus aihininga ihuha hababu o Yesus wileha hi ādono hara mahange. De o Petrus wohaluhokali, "Jou, Jou nohihiōriki hagala mata-mata. Jou nohihiōriki ngohi toni hiningi Jou!" Daha o Yesus witemo unangika, "Napaliara Ahi duba-duba. **18** Igoungu itiai ahi demo nēnanga: Maōraha ngona nomagōikahi, ngona mahirete noma bulu anigoronaino, dé

noiki okiaika dika ngona animau. Mä nako ngona aha initimonoka ngona nohi töakika anigiama, dé o nyawa mahomoa iniliko ngona dé iniao ngona okiaika ngona noluku noiki." **19** (De o demo gënanga o Yesus wohimatoko sarakia o Petrus aha wohonenge mangale wihimulia ma Jou Madutu.) I böto de gënanga o Yesus witemo o Petrusika, "Nohi niki Ngohi!" **20** Maöraha o Petrus womaiduli, ünanga wimäke aiporetoka winöniniki wihohininga o Yesus. (Unanga wogogere imadatekuku de o Yesus maöraha yolomo dé wileha Unangika, "Jou, o nagona aha i ni hininga dorou?") **21** Wimäke ünanga, o Petrus wileha o Yesusika, "Jou, sarakia de ünanga nënanga?" **22** O Yesus wohaluhu, "Demo ma ade Ngohi tomau ünanga wogogogere wowango hiädono Ngohi toböa, gënanga tongonaua ani datoro. Mä ngona, nohi niki Ngohi!" **23** Yodogerewoto o abari nënanga iwinöniniki o Yesus manga boluoka, winöniniki gënanga aha wohonengua. Enahioko o Yesus wotemoua winöniniki gënanga aha wohonengua, duga-duga: "Demo maade Ngohi tomau ünanga wogogogere wowango hiädono Ngohi toböa, gënanga tongonaua ani datoro." **24** Unanga wohidöaka o hakihi mangale idodadadi-idodadadi gënanga. Unangö mawatulihoka. Dé ngone hohiöriki okia wohi demoka gënanga itiai. **25** Ma ngöeohi o hali mahomoa wadai o Yesus. Demo maade mata-mata gënanga hatulihi hatëngo-tëngo, ngohi tamäo o dunia nënanga yodimoaka honoa buku mata-mata aha yato tuli-tulihi gënanga.